

天
啓
滇
志

滇志卷之二

地理志第

沿革郡

全省

漢置益州郡領縣滇池雙栢連然俞元穀昌昆澤葉
榆律高不韋雲南雋唐賁古勝休來唯等共二十
四屬越雋郡縣遂文靖蛉共二屬牂牁郡縣宜
蘭等共四

東漢仍爲益州領縣勝休律高昆澤建伶等共十七
永昌郡領縣哀牢博南等共八

蜀漢改置郡建寧雲南興古共三

晉置寧州領郡雲南興古建寧永昌共四屬縣雲平
鐸封漢興新定談橐修雲冷丘永壽雍鄉南浩等
共四十五

秦康以後改置郡益州晉寧平夷共三

宋仍爲寧州領郡建寧晉寧牂牁西河東河河陽雲
南興寧興古梁水等共十縣同樂談橐萬安新定
新興萬壽晉樂丹南成昌建安雲南雲平西安句
町南興梁水西隨新封鐸封等五十二

南齊爲寧州鎮領郡建平梁水建寧晉寧興寧西阿
平樂永昌等共十四屬縣同樂新定晉樂綏寧月
南梁水西隨驃封永豐綏雲遂安臨江雙柏雲平

都陽晉綏新城成昌西中南興新豐益寧安寧永
安壘柳西城等共七十二

晉宋齊寧州所領郡邑皆不止此今止錄在今境內
者

唐置雲南郡領縣姚城瀘南長明共三

元置雲南諸路行中書省爲路中慶威楚武定鶴慶
雲遠麗江孟傑普安澂江普定建昌德昌會川廣
西元江太理柔遠茫市鎮康鎮西平緬麓川木邦
孟定蒙兀等共三十七府仁德栢興共二
屬府北勝永昌騰衝共三

州高盟開南威遠順菴葉永寧通安蘭巨津羅雄

建安瀘州閬州都隆姜昌德威龍普濟武安黎
漢理麻龍等共五十四

縣揚林邵甸威楚南甸易籠石屏臨西芳華通泉
交水石梁羅山普舍研和邑市馬美歸厚中瀘沽
關鹽金等共四十七

皇明改置布政司領府十二雲南大理臨安楚雄
江寧化廣西景東廣南順寧永寧鎮沅軍民府八
永昌曲靖鶴慶姚安尋甸武定元江麗江

武定今去
軍民字

州三塊勝雲州

今改屬
順寧府

新化

今改屬
臨安府

長官司一者樂甸

其屬廉府三宣慰司六宣撫司三州四長官司一

雲南府

唐虞為南爰昧谷之交夏商周國曰鄯閩戰國統滇
國漢武帝置益州郡蜀漢改建寧郡晉分益州置寧
州李特據蜀蜀漢州未仍置寧州鎮隋置昆州唐武
德初置南寧州尋改置雲南郡開元以後至宋為駭
或恭氏竊據元初置善闡萬戶府至元中改中慶路
本朝改為府領州四縣九

昆明縣

附郭

漢為滇池縣地隋為昆州境唐為晉寧縣地元初置
二千戶府改置善州領昆明官渡二縣後廢州尋又
併官渡總為一縣

本朝因之為郡縣邑矣

富民縣

唐初為西寧州也貞觀中改西寧曰永州號梨溝
元蓋院初立梨溝千戶所後改縣如今名

宜貴縣

唐初為羅東龍巖觀中置厚州領厚州等縣元憲宗
立宜良及太池千戶所隸嵩明萬戶府至元中置宜
良州順太池縣後省太池并為一如今名

羅定縣

唐為蠻羅部所居宋大理高量威食高曰連慶治其
地元置羅定州隸中慶路後改縣屬安寧州

本朝因之弘治十二年改屬府

晉寧州

漢滇池縣地晉隆安初置晉寧州唐武德初置晉寧縣後蒙氏改爲善馬陽城蓋却元憲宗末陽城蓋萬戶至聖祖後置州如今名以歸化呈貢二縣隸焉

歸化縣

漢安仁城地又名衣美龍元初隸昆夷縣唐武宗立呈貢縣大興龍安江案洞置縣如今名

呈貢縣

漢有故城曰呈貢元憲宗立呈貢千戶所至元中立嚴貢縣

本朝仍改呈貢

安寧州

戰國滇犍犂川地漢為益州郡連然縣晉屬建寧府
屬昆州唐武德初置安寧縣隸昆州宋大理以高六
宋建元初隸犍陽城置為府建元初立安寧府建元
後改為州如今名領縣一為祿豐

祿豐縣

漢書徼外村地為蠻雜居宋大理高智昇子義勝治基
地元初隸安寧千戶所初江省石如醜俗名祿祿記
為祿豐遂名云

昆陽州

漢益州郡地晉屬寧州隋南寧夷蠻貊降拜昆州刺史治其地唐有城曰巨橋宋段氏據之隸善闡元憲宗併羅昌等十二城立巨橋萬戶府至元中始改爲州如今名領縣三三泊易門

三泊縣

漢名那龍城宋大理段氏據之隸善闡元初隸巨橋萬戶府至元中始置縣如今名蓋以漢名之也

易門縣

漢烏蠻所居宋大理高福世守其地元至元間立漢門千戶所隸巨橋萬戶府尋改爲縣如今名

高明州

戰國爲滇國地漢有人築金城于此曰長州因築臺
與蠻盟故俗其地曰高明唐蒙氏置長城郡宋屬段
氏改爲盟郡元初置高明萬戶府至元中改爲長州
尋陞高明府後復改爲州領楊林邵甸二縣

本朝因之洪武中省邵甸成化中省楊林併爲州

大理府

二代時國曰昆彌戰國時屬楚漢元封二年置益州
郡漢屬永昌郡蜀漢置雲南郡晉因之兼置寧州
李特據蜀分置漢州宋屬河陽郡齊改屬西河郡隋
復置南寧州尋屬總管府唐屬姚州天寶以後蒙氏
竊據後鄭趙楊段四姓繼據之元憲宗時立上下二

萬戶府至元間改置大理路

本朝改路為府領州四縣三長官司

太和縣

漢葉榆地唐開元皮羅閣取之名太和城元憲宗時
立三千戶所至元中罷千戶所立錄事司并縣後復
隆為理州尋又罷州改縣曰太和及河東路屬大理
路

本朝因之為府附郭

趙州

漢屬永昌郡唐為姚州境地蒙氏為趙贍皮羅閣置
趙郡閣羅鳳改趙州晉段氏改天水郡元憲宗時立

趙賧千戶所隸大理至元中改爲州又于白崖賧立
建寧縣尋革縣并爲州如今名領雲南縣

雲南縣

漢置雲南縣隸益州郡東漢屬永昌郡蜀漢改屬雲
南郡唐初置雲南州貞觀中改匡州顯勅弄匡州一
縣張仁果據之號白子國後氏爲雲南州改品甸縣
晉因之爲雲南州元立品甸千戶所至元中復爲雲
南州後降之爲縣今仍之

鄧川州

漢爲樸榆縣地唐爲遼備州隸姚州都督府後爲遼
賧詔所據南詔併之置鄧川賧宋段氏因之元立德

源千戶所隸大理上萬戶府至元中改爲州如今名
順縣一爲浪穹

浪穹縣

漢爲樸榆縣地浪穹詔居之唐初爲南詔所侵其王
移保劍州更稱浪劍卒爲南詔所併立浪穹州元立
浪穹千戶所隸大理上萬戶府至元中改爲縣如今
名

賓川州

漢爲樸榆地唐爲姚州地元爲太和趙州雲南縣之
境

本朝弘治七年割太和九里趙州一里雲南縣二里

始設爲州

雲龍州

元舊雲龍甸至元末立雲龍甸軍民總管府并防送千戶所隸金齒宣慰司

本朝始設爲州

十二長官司

元本雲南楚場地至元間置十二關防送千戶所本朝始設長官司

臨安府

三代時爲句町國漢置句町縣屬牂牁郡蜀漢屬興古郡晉屬寧州唐屬黔州都督府天寶末沒於南詔

置通海郡都督府宋初段氏改爲通海節度尋改爲
山郡後復爲通海郡元憲宗時內附置河楚郡萬戶
至元初改置南路總管府尋改臨安路屬宣慰司
本朝改路爲府願州四縣四長官司九正德六年省
安南長官司入叅自縣天啓二年復設萬曆十九年
置新平縣二十五年改直隸新化州屬焉今願州五
縣五長官司九

建水州

唐爲馬鹿蠻地接壤交趾爲雲南極邊古稱步頭亦
云巴甸元和間蒙氏始城之宋段氏時爲步鹿蠻所
據元初內附置建水千戶所屬阿楚萬戶至元中改

為州如今名

石屏州

漢蠻曰舊竹唐為廢蠻居其地宋阿楚蠻奪據之開地得石屏聚為居邑因名石屏元末改為州今仍之
阿迷州

漢以前蠻名阿寧訛為阿迷元初立阿寧萬戶府至元間隸南路總管府大德間隸臨安廣西元江宣慰司

本朝始改為州

寧州

漢為益州郡後改沈黎郡晉梁為南寧州地唐

初置西寧州獻觀中改黎州天寶末沒於蠻號浪曠
後改寧部元憲宗初內附置寧部萬戶後改寧海府
至元中又改寧州隸臨安領通海崑峨西沙三縣尋
又省沙入州

本朝仍其州名改隸二縣屬府

新化州

漢舊焉馬龍他即二甸阿楚諸部蠻所據元憲宗時
立附立二千戶以屬寧州萬戶府至元中以馬龍等
甸併於他即置司屬元江路

本朝改焉馬龍他即甸長官司直隸布政司弘治間
設新化州直隸布政司萬曆二十五年改屬本府

通海縣

漢屬犍牁郡唐蒙氏立爲通海郡宋段氏改爲山郡
後立通海郡元初置通海千戶隸善闡萬戶府至元
中改隸寧海府府廢改隸臨安路
本朝改爲縣

河西縣

唐初爲西宗州之河西縣天寶後沒於蠻名其地曰
休臘元憲宗初內附卽阿契部立萬戶休臘隸之十
三年改爲河西州屬臨安路後改爲縣如今名

崑崙縣

漢爲益州郡地晉屬南寧州唐時爲崑崙縣新舊名

崑崙郡元初內附立千戶所至元中改爲州領印州
平甸二縣尋降爲縣有二縣爲御

本朝仍爲縣

張自縣

唐舊有城在夷所築山名曰則訛爲張自南詔時趙
姓者據之宋段氏時爲阿楚蠻所有元初內附置張
自平戶所隸阿楚蠻方府後改爲縣如今名

新平縣

漢崑崙僭蠻所居唐爲阿楚蠻酋所有元初內附立千
戶所至元中設平甸縣屬崑崙州

本朝改爲平甸縣隸崑崙州後爲丁苴自改夷賊所

據萬曆十九年討平之始改爲縣

納樓茶甸長官司

唐蒙改爲茶甸元初置千戶隸阿寧萬戶至元中改
隸壽闡宣慰司後分爲二千戶隸雲南行省尋改隸
臨安宣慰司又改納樓茶甸

本朝置長官司仍其名

教化三部長官司

唐時蠻名強現漢訛爲教化部強現牙車三部酋也
元爲強現三部隸臨安等處宣慰司後屬強現四部
本朝始設長官司

玉屏山長官司

元元良吉亥征交趾路經阿寧立太小二部

本朝改爲長官司

本朝改爲長官司

漢舊鐵谷甸部元至元中歸附撥隸元江路

本朝改設長官司

漢處甸長官司

漢舊也漢漢處甸部元置軍民副萬戶隸雲南行省

據罷副屬元江路

本朝改置長官司

思陀甸長官司

漢舊爲官桂思陀部元置和泥路隸雲南行省後屬

元江路

本朝改置長官司

左能寨長官司

唐前爲思陀寨旬後爲左能寨

本朝改置長官司

落悲旬長官司

唐前爲泮溪落悲旬屬思陀旬後自爲酋長元置軍

民萬戶隸雲南行省後屬元江路

本朝改設長官司

永昌府

古哀牢國漢武帝時內附置平夷縣屬益州郡後叛

建武中其長賈果請降國封為首長永平初復叛太
宗張勳平之立蘭渝郡尋改永昌郡後柳貌求內附
置秦州懷柔二縣割益州郡西卻都尉所領六縣為
蜀漢仍為永昌郡晉因之唐屬姚州都督府後為爨
氏所據歷段氏高氏皆為永昌府元憲宗七年於永
昌立三千戶所隸大理萬戶府至元十一年置永昌
州十五年復為府隸大理路及置金齒等處宣撫司
本朝仍置府立金齒衛洪武二十三年省府改衛為
軍民指揮使司景泰中設鎮嘉靖中罷鎮復置軍民
府領州一縣二安撫司一長官司二

保山縣

西漢武帝時為不常縣境東漢西南為袁牢境東北
為不常境蜀漢初袁牢不常二縣唐為蒙氏地宋為
段氏地元屬大理萬戶府

本朝嘉慶元年始置縣附郭

騰越州

周為袁牢國境漢為永昌郡西境晉屬寧州唐置羈
靡州開元中蒙氏異牟尋即其地立輓化府宋屬段
氏改騰衝府元初屬高氏憲宗三年內附至元十一
年改騰越州又藤越縣十四年改騰衝府尋又改為
騰衝征緬招討司

本朝洪武三十三年改騰衝守禦千戶所隸金齒司

正統十四年陞騰衝軍民指揮使司嘉靖二年復置
騰越州隸永昌軍民府以騰衝所土民隸之改騰衝
軍民指揮使司爲騰衝衛

永平縣

東漢置博南縣屬永昌郡晉因之後改永平縣唐南
詔蒙氏置勝鄉郡宋大理段氏因之元初廢郡立永
平千戶所後授改爲永平縣屬永昌府

本朝因之洪武三十二年改屬金齒指揮使司立永
平禦二千戶所嘉靖二年改隸永昌軍民府

潞江安撫司

元以前名怒江甸至元間置柔遠路軍民總管府治

怒江甸隸金齒等處都元帥府後爲麓川宣慰司所據

本朝洪武十五年改爲柔遠府後置潞江長官司永樂九年陞文撫司

鳳溪長官司

元爲永昌府東境

本朝洪武二十三年始設長官司

施甸長官司

唐爲銀生府北境宋段氏置廣夷州元爲石甸長官司隸金齒路

本朝仍設長官司

楚旗府

戰國為滇國地漢屬益州郡晉咸康中置安州尋罷
益州遂為雜蠻所據蠻酋築城居之名威楚又名
碓碌唐貞觀末諸蠻內附置傍望求立覽五州天寶
末蒙氏置銀生節度宋段氏以銀生屬姚州號為高
第賧後段白鹿部又改威楚部元憲宗八年置威楚
萬戶府至元八年改為威楚路後置威楚開南等路
宣撫司

本朝洪武十五年改置府領州二縣五

楚雄縣

唐蒙氏為安州威楚縣後為蠻蠻所據宋段氏屬姚

州元初置千戶所至元中改置威州仍立富民淨樂
二縣尋廢二縣降為威楚縣

本朝更為各附郭

鎮南州

漢為樓落所居有城曰雞和唐蒙氏置石鼓縣又於
此却地置俗富鄉宋屬段氏元初置太舍千戶石鼓
百戶至元中改太舍千戶為鎮南州置石鼓定邊二
縣後俱裁省

本朝仿之

南安州

唐為黑蠻蠻所居地寨名摩芻宋為高氏所據元初

置摩曷千戶屬威楚萬戶至元中改爲州如今名

定遠縣

漢爲越嵩郡地唐置西濮州貞觀中改隸州後沒於
蠻朱屬段氏元初置牟州千戶至元中改定遠州仍
立南寧縣尋省南寧改州爲縣如今名

廣通縣

唐爲古路賧地後沒於蠻南詔立爲路賧縣元置置
路賧千戶所至元中改爲縣如今名

砮嘉縣

唐爲夷獠所居五代爲段思平所據宋紹興中蒙古
忽必烈滅段氏赦段智興封爲摩訶羅時有星墜於

黑初山巔化為黑石人咸異之遂名硿嘉元至元間
改為硿嘉平府所尋改為縣如今名

定邊縣

唐時為樸落堡所居地曰南澗宋為大理舊治所元
置縣如今名

曲靖軍民府

漢為夜郎味縣地屬滇置建寧郡後分置興古郡晉
屬寧州梁為蠻瑣所據隋置恭州協州唐置南寧州
改恭州為曲州分協州置靖州俱屬戎州都督府天
寶末沒於蠻南詔蒙氏置石城郡宋大理段氏因之
後為唐彌部所據元初置唐彌部萬戶至元間陞中

路後又改曲靖路宣撫司

本朝改為曲靖軍民府領州四縣二

南寧縣

漢益州味縣地唐置南寧州天寶末沒於蠻元初置千戶所隸唐彌部萬戶至元間陞為州尋又改為縣如今名附郭

亦佐縣

漢為鮮河郡宛溫縣地蜀漢屬興古郡晉因之唐為盤州地後沒於蠻號夜苴部元至元間入羅雄州後置縣如今名

本朝洪武初併屬羅雄州後改隸府

霑蓋州

漢為牂牁郡元溫縣地蜀漢屬興古郡唐初置西平
州貞觀中改為盤州屬戎州都督府天寶末沒於蠻
後為唐彌蠻所據元初置唐彌部萬戶至元中改置
州如今名頗交水石梁羅山三縣
本朝併三縣及越州五鄉入焉

陸涼州

漢牂牁郡平夷縣地蜀漢屬興古郡晉分置平夷郡
唐置盤州天寶末沒於蠻蹄落溫部元初內附置落
溫千戶所屬落蒙萬戶至元中改置州如今名頗阿
納苦革二縣

本朝併二縣入焉

馬龍州

漢爲益州郡地蜀漢爲興古郡地晉因之唐中沒於蠻名撒匡白刺者之元初內附置納垢千戶所至元中改爲州如今名順通泉縣

本朝併縣入焉

羅平州

漢爲牂牁郡宛溫縣地蜀漢爲興古郡地晉因之唐沒於蠻爲塔敵納夷甸元初內附隸普摩千戶至元中割夜郎苴部爲羅雄州隸曲靖路

本朝因之萬曆十四年始設流吏名羅平

潞江府

戰國時爲滇國地漢置俞元縣屬益州郡蜀漢屬建寧郡梁屬南寧州隋屬昆州唐屬牂州隸黔州都督府開元中改爲羈靡州天寶末徙於蠻號羅伽甸南詔蒙氏爲河陽郡宋大理段氏折蠻爲三部曰強宗曰休制曰步雄部步雄部後居羅伽甸者號羅伽部元憲宗四年內附六年置羅伽萬戶府至元三年改爲中路十六年陞潞江路屬雲南行省

本朝改路爲府領州二縣三

河陽縣

唐麼麼蠻所居之地後爲判蠻奪而有之南詔於此

置河陽郡元初置羅伽千戶所至元中改河陽州尋降為縣如今名附郭

江川縣

漢時名碌雲異城又名易籠唐蒙氏徙曲旺蠻居此以白蠻守治之宋氏以麼麼蠻子孫分管其地名步雄部元初置千戶所至元中陞為州尋降為縣如今名

陽宗縣

唐麼麼蠻居之號強宗因以名部訛為陽宗元初內附置陽宗千戶所至元中改為縣如今名

新興州

漢為蜻蛉弄棟二縣地梁為土人爨瓚據之分為西
爨地唐貞觀中置永州屬戎州都督府天寶末沒於
蠻南詔爨氏置溫賓州宋大理縣徙唐爨蠻居此
元置部傍普舍二千戶所至元中改部傍千戶為休
納縣又於休納置新興州領普舍研和二縣後首休
納入州屬澄江路

本朝省研和普舍入焉

路南州

漢為益州域蜀漢為建寧郡境唐為昆州地夷名路
甸天寶末為黑爨蠻落蒙所據號落蒙即元憲宗時
置落蒙萬戶府至元中改為州如今名頗茫兩縣

本朝弘治四年并縣省焉

蒙化府

戰國時為滇國地漢為益州郡地東漢屬永昌郡唐屬姚州都督府初天竺張仁果據之號白國至樂進永遜位於蒙氏細奴邏號蒙舍詔改稱南詔徙居太和城蒙舍為舊都永泰初改為陽瓜州宋氏改開南縣元憲宗七年置蒙舍千戶所至元十一年改為蒙化府十四年陞為路二十一年復降為州屬大理路

本朝洪武初仍為州正統間復改為府

鶴慶軍民府

漢屬益州郡東漢分屬永昌郡唐初爲越祈詔地夷
名漾江一名鶴川元開末屬南詔置謀統郡段氏改
謀統府元初內附置鶴川尋置二千戶仍稱謀統隸
大理上萬戶府至元中授爲鶴州後陞鶴慶府尋改
爲鶴慶路

本朝洪武十五年改爲軍民府順州二

劍川州

漢屬益州郡唐爲義督羅曹城一名劍川昔浪寧詔
與南詔戰敗走保劍川改稱劍浪詔後爲南詔所併
置劍川節度宋段氏改爲義督賧元置義督千戶至
元中改劍川縣屬鶴慶路

本朝陞爲州

順州

唐爲牛臉地南詔徙諸浪然居之與羅落蠻雜處後
羅落蠻酋成斗族漸盛遷居牛臉宋屬大理元時內
附至元間改爲州如今名隸麓江路後十年改隸比
勝府

本朝仍其州名改隸鶴慶

姚安府

戰國屬楚漢置弄棟蜻蛉二縣屬益州郡東漢屬永
昌郡蜀漢屬雲南郡唐置姚州都督府天寶間南詔
據之改爲弄棟府段思平改爲統天邏又改姚府至

段政嚴封高泰明之子明清為演習世有其地元憲
宗三年內附七年立統矢十戶所至元十三年改置
姚州屬大理路天曆元年陞姚安路

本朝改路為府後又改姚安軍民府領州一縣一

姚州

沿革全府附郭

大姚縣

漢為蜻蛉縣地屬越雋郡蜀漢屬雲南郡唐置西濮
州後更名髶州宋大理段氏屬姚安夷名大姚堡元
元初置大姚十戶所至元間改為縣如今名

廣西府

古滇國東南境漢爲益州牂牁郡地蜀漢屬興古郡
晉屬寧州隋屬牂州後爲東蠻烏蠻獞鹿等部所居
唐爲羈縻州隸黔州都督府後師宗獞勒一部浸盛
蒙氏段氏俱不能制元憲宗七年內附隸落蒙萬戶
府至元十二年籍二部爲軍置廣西路十八年復爲
民屬臨安等處宣慰司

本朝改爲府領州三

師宗州

宋蠻蠻逐獞楚等居之其後有師宗者據匿弄甸號
師宗部元初隸落蒙萬戶府至元中以本部爲千戶
把總領阿寧豆勿阿盧豆吳四千戶屬廣西路後改

置州如今名

彌勒州

宋安莫徒蠻之裔彌勒得郭甸巴甸部龍而居故其部曰彌勒元初隸落蒙萬戶府至元中以本部爲千戶總把領古翰裏惡步龍阿欵四千戶屬廣西路後改爲州如今名

維摩州

元立維摩千戶隸阿達萬戶至元中以本部爲千戶總把領維摩屈申二千戶隸廣西路後改爲州如今名

尋甸軍民府

古滇國地昔僕射蠻居之號仲劉濫源後烏蠻之裔
新丁奪而有之號新丁部後歸蒙氏為尋魚宋段氏
改仁德部元初置仁德萬戶府至元間改仁德府頗
為美歸厚二縣

本朝洪武中改尋甸軍民府有二縣成化十二年土
酋免弟爭襲遺難始改設流為尋甸府

武定府

戰國為滇國地漢屬益州郡蜀漢屬建寧郡隋為昆
州唐隸姚州屬戎州都督府唐僊鹿等蠻居之後附
蒙氏宋段氏使蠻阿剌治此其後沒盛併納浹脫共
籠等地以遠祖羅婺為部名元憲宗時內附置羅婺

萬方府隸威楚至元八年併仁德于失二部入羅婆
更置北路總管府尋改武定路置南甸縣

本朝改爲武定軍民府有南甸縣隆慶元年鳳翔祖
叛呂光洵討平之始設流萬曆三十五年鳳翔謀叛
去軍民二字改爲武定府順州二縣一

和曲州

晉蒙氏據其地宋烏羅婆部段氏以烏蠻阿剌洛之
元初改巨遠甸曰和曲至元中陞爲州如今名順元
謀南甸二縣

本朝嘉靖末築建府城移州附郭有南甸焉

元謀縣

元至元中爲琢州元謀縣隸和曲州

本朝因之

祿勸州

元至元中以洪晨祿勸甸置祿勸州頗易龍石舊二縣屬武定路

本朝仍爲州省易龍縣正德間復省石舊縣

景東府

古傲外荒僻之地名曰柘南蠻名猛谷又云景董爲昔樸和泥二蠻所居漢以來未見至唐蒙氏立銀生府後金齒白蠻侵奪其地按府治於威楚遂爲生蠻所據歷宋段氏不能制中統初始討平之以其所部

隸威楚萬戶至元中置開南州隸威楚路

本朝改爲景東府

元江軍民府

古西南極邊之地唐蒙氏屬銀生節度徙徭蠻獠
周改等十姓戍之又開威遠等處置威遠賧後和泥
蠻據其地朱僕智高之黨竄於此尋爲蒙麼徙蠻阿
楚諸部所有元憲宗時內附至元中置元江萬戶府
後於威遠更置元江路領羅盤馬龍等十二部屬臨
安廣西元江等處宣慰司

本朝洪武十五年改元江府永樂四年改元江軍民
府領長官司一

因達羅發甸長官司

宋名羅槃甸元割羅槃部於威遠立元江路屬臨安
廣西元江等處宣慰司

本朝始置長官司

元麓江軍民府

古荒服地與吐蕃接壤漢屬越雋州二郡東漢兼
屬永昌隋屬雋州唐因之太和以後沒於蠻為越析
詔貞元中屬南詔置麓江節度未為唐所據
段末不能制元憲宗四年討末之置茶罕章宣慰司
至元中改置江路軍民總管府尋罷府置宣撫司
本朝洪武十五年改麓江府後改麓江軍民府願州

四舊隸臨西二縣正統二年廢

至通安州

漢置定祿縣屬越雋郡唐改定祿曰昆明屬嵩州又
隸為昆明軍本縣以後為越新麼步諾地後併於南
詔宋僕獬蠻居之後又為麼步蠻葉占其所據屬大
理元憲宗三年內附中統四年以麥良為察罕章管
民雲十四年改三臉為州如今名附郭

寶山州

漢為益州郡郡龍縣境東漢屬永昌郡唐為麼步蠻
所據瓦肉附名其寨寨罕忽魯罕至元間置寶山縣
尋陞為州屬麗澤路

本朝因之

蘭州

東漢爲博南縣屬永昌郡唐屬南詔爲邏蠻所居名
羅眉川宋段氏置蘭滄郡元內附至元間置州如今
名

巨津州

唐爲羅婆允賒濮攏二蠻所居後麼些蠻奪其地南
詔併之屬麗江節度元內附至元間置州如今名

臨西縣

唐爲麼些詔之地元至元間以其地西隣吐蕃境置
臨西縣隸巨津州

本朝仍之正統二年爲番人所據僅存一寨後廢

廣南府

宋名特磨道僕智高之裔居之元至元間立廣南西路宣撫司領路城等五州後來安路奪其路城去林羅左三州惟順安寧州并富州

本朝洪武十六年歸附改爲廣南府順州一

富州

元至元中置富州及安寧州

本朝初因之後省安寧州入府

順寧府

禹貢梁州域周爲百濮所居孟津之會濮人與焉唐

龍朔中三濮遣使朝貢後終宋不通中國蒙氏段氏
不能制元泰定間始內附天曆元年置順寧府并置
寶通州慶甸縣

本朝洪武十五年仍置府後省州縣入焉萬曆二十
七年始設流仍爲順寧府改屬金騰道三十四年以
雲州爲屬

雲州

舊蠻猛祐地元中統初辟文內附授長官司屬麓川
路

本朝洪武中內附仍以其首爲長官司正統三年其
首隨征麓川有功陞大候州敕學其後也分居其地

後巡撫陳用賓俱因亂討平之請設流官賜名雲州
領猛緬長官司一猛猛撒土巡檢司二隸布政司
萬曆三十四年改隸本府

永寧府

古名樓頭賧又名荅藍麼些蠻祖泥月烏逐出吐番
遂居其地唐屬南詔後爲麼些蠻所據宋屬改元
世祖駐日月和即此也憲宗三年內附至元十四年
置茶藍管民官十六年民置永寧州屬北勝府
本朝洪武中屬鶴慶府二十九年改屬蘭滄衛永樂
四年陞爲府領長官司四

草甸長官司

判次和長官司

有羅長官司

尾魯之長官司

以上四長官司俱

本朝永樂四年設

鎮沅府

古西南極邊地濮洛雜蠻所居唐蒙氏爲衆生府之地其後金蔭楚夷侵奪之宋段氏莫能服元初內附立威遠州屬威楚路後置茶板寨屬元江路

本朝洪武三十三年改置鎮沅州永樂四年陞爲府
願長官司一

祿谷寨長官司

本朝永樂十年設

北勝州

戰國兩漢屬白國時鐵板西北為施蠻所據唐貞元
中異牟尋始開其地名北方賧徙昆彌河白人及擺
擺麼麼蠻實之號劉羗宋段氏以高大惠治之改為
成紀鎮元憲宗三年其酋高彥內附至元十五年置
施州十七年改北勝州二十年陞為府屬麓江路軍
民宣撫司

本朝洪武十五年復為州屬鶴慶府十九年置蘭澹
衛軍民指揮使司以州隸之正統六年改隸布政使
司與衛同治又以蒺藜州屬衛隸雲南都指揮使司
蒺藜州

唐爲羅共賤地獺獺麼步蠻世居之元憲宗時內附
至元中以羅共賤置葭蘆州屬麗江路後改屬北勝
府

本朝洪武中屬鶴慶府尋改屬本衛

者樂甸長官司

漢爲荒服地唐蒙氏屬焉龍他郎二甸地曰猛摩夷
名者由以銀生府管之後爲阿楚諸部所據宋段氏
莫能服元至元間屬他郎甸管民官隸元江路
本朝洪武末始設長官司隸布政使司

附論

傳曰天子有道守在四夷噫其起於上古乎想其

時中水截然若農之有畔若不爲我守然中土皆
不荒之地裔夷無不足之爭不侵不叛不相往來
實以各相守爲我守粵稽五典已見三苗及平夏
后殷周而降或稱萬國來朝而南方乃有百國是
爲百濮鄒閭國滇也昆彌國大理也句町國臨安
也牂牁國烏蒙也其他九十餘多不可考汲冢書
獻令曰西南產里百濮以象齒短狗爲獻產里卽
今車里周公作指南車以導之歸者是也春秋時
叔熊逃難於濮而蠻楚蚡昌始啓濮戰國仍屬楚
襄王使將軍莊躒略巴黔以西以兵威定之會秦
擊楚道塞歸報不能得因以其衆王滇變服從其

俗長之滇有楚俗之始也秦始皇常頡略五尺道置吏漢元狩間彩雲見南中遣使跡之雲南之名此始滇王當羗對漢使語不遜武帝惡之時白崖有天竺白飯王之後名仁果者稱白王為衆所戴天子冊為滇王仍治白崖躋世乃絕白人之名此始元封中司馬相如入西夷土人盛覽從相如學歸授鄉人滇之文教此始是年郭昌衛廣平其未服滇王降請置吏入朝以為益州郡賜玉印益州之名此始建武中樛榆諸羗叛剋高連破之元和中滇池有神馬井露白鳥之祥乃建學立師滇有學較此始蜀漢建興改益州郡為建寧又分建寧置

雲南郡即今雲南縣地雅閣附吳孟獲誘煽諸夷
武侯斬雅閣服孟獲四郡皆平乃收用豪傑時仁
果十五世孫龍佑那者能撫其民號大白子國侯
仍以其地封之晉宋齊梁陳隋皆以守令治其人
酋長世其官唐貞觀間建寧白國長張樂進求時
哀牢夷納農邏耕于蒙之巍山有祥異所居成聚
樂進求懼避國農邏爲奇王自是蒙楚分立爲六
詔六詔之名此始唐置姚州南詔賂王昆合六詔
爲一冊爲雲南王南詔之名此始天寶間南詔殺
張虔陀取夷州鮮于仲通擊之敗績南詔北結吐
番以自固後爲吐番所苦請內附仍封之以常羣

爲安撫使車以南詔安破吐蕃取鐵磨六城俘其五王南詔獻地圖土貢賜金印吐蕃不復爲雲南患此始宋王全斌既平蜀以圖獻太祖以玉斧畫大渡以西曰此外非吾有雲南幾爲絕域元世祖錄麗江入大理定鄯闡爲中慶路

皇明置雲南布政使司聲教之盛始此上下數十載興衰之跡有如傳舍夫亂不極則治不生孟子辭楊墨而闢之曰一治一亂中國之治亂也蘇亮齊至於戰國中間聖聖賢賢猶迭興未之絕而漢之治亂則錄戰國至於今也天將使此土化鄯姜爲高陵化荊棘爲松柏鷄犬爲鹿鶴化濁惡爲

清涼非

聖人而不能故挈而畀之至是正朔始有定奉歷年二百六十以來如一日雖有小警旋為大定盛矣盛衰相乘思其衰者保其盛者也慎保哉其大夫士庶人皆是庶人何以為保惟善以為保何人無善何人不可為善率先獎掖而進之即一庶人可為衆人又積而為人人是親親長長之成效而士大夫之以也凡此所謂臆見長語然出入包司空者為多司空尚論漢事嘗厭別傳近誣俗至勝國而上又多猥瑣不屑書而卒不免旁引也事核而真貶相流而不能中斷也勢使然也

疆域

全省

滇在大荒之西南其地東界廣西泗城州七百五十里南界交趾四百六十里西界西洋海六千里北界四川會川衛四百里東北界貴州普安衛五百里東南界貴州烏撒衛六百三十里西南界南海五千五百里西北界吐番二千里自省城至順天一萬六千四百十五里錄黔東行渡沅澧至武陵錄蜀西行絕巴江咸會於江陵經襄漢渡大河入燕此一路也西入劍門出潼關取道洛陽而北又一路也至應天七千二百里諸路亦會於江陵錄漢陽遵大江而南陸路

取大江之北皆可入留都其詳其在旅途類中

雲南府

於滇爲會城其地東界激江之路南一百八十里南
界激江之河陽一百二十里西界楚雄之廣通三百
五十里北界尋甸二百一十里附郭縣爲昆明編里
二十六里東一百五十里其縣爲宜良編里四南四
十里爲呈貢編里四又六里爲歸化編里二又九十
里其州爲晉寧州編里五又一百二十里爲昆陽編
里四西南二百里其縣爲三洎編里二又二百五十
里爲易門編里三西七十里州爲安寧編里十西北
一百四十里縣爲羅次編里三又二百一十里爲祿

豐編里三北一百里為富氏編里三東北一百三十里其州為嵩明編里六幅員較列郡為獨廣焉

大理府

在省之西其地東界姚安二百四十四里南界蒙化七十二里西界永昌之永平一百八十里北界鶴慶一百二十里附郭縣為太和編里五十東一百里其州為賓川編里十二南六十里為趙編里十五西五百里為雲龍編里二北九十里為鄧川編里十五東南一百四十里其縣為雲南編里十二又三百里長官司為十二閭東北一百一十里其縣為浪穹編里十二自府至省八百九十里

臨安府

在省之東南其地東界廣西之維摩二百四十里南
界寧遠六百八十里西界元江一百八十里北界激
江二百里附郭州建水編里八東一百五十里其縣
爲蒙自編里十五又東南二十里其長官司爲安
南西七十里其州爲石屏編里八北百二十里其縣
爲新平編里四東南一百二十里其州爲阿迷編里
十二又二百五十里其長官司爲王弄山三百五十
里爲敍化三部西南一百四十里爲勸客甸一百五
十里爲漢處甸一百八十里爲納樓茶甸二百里爲
落恐甸二百三十里爲左能寨二百五十里爲思陀

甸西北一百八十里其縣為河西徧里四又二百六十里為岷城編里七東北一百五十里為通海編里二又二百五十里其州為寧編里七又五百二十里為新化編里十四自府至省四百三十里

永昌府

在省之西其地東界蒙化三百六十里南界灣甸二百七十里西界隴川四百里北界大理之雲龍一百二十里附郭縣為保山編里十東二十五里長官司為鳳溪南一百里為施甸三百六十里其州為騰越編里八西南一百三十里安撫司為潞江東北一百七十里其縣為永平編里九自府至省一千二百里

楚雄府

在省之西其地東界雲南之祿豐二百里南界元江
三百八十里西界景東二百八十里北界姚安一百
八十里附郭縣爲楚雄編里十東七十里爲廣通編
里四南四百五十里爲磅嘉編里一西三百二十里
爲定邊編里五東南五十里其州爲南安編里五西
北七十里爲鎮南編里四一百二十里其縣爲定遠
編里五自府至省四百二十里

曲靖府

在省之東其地東界貴州之普安一百七十里南界
廣西一百七十里西界尋甸一百四十里北界四川

之烏撒二百九十里附郭縣為南寧編里三東二百五十里為亦佐編里二東南二百七十里其州為羅平編里三南一百二十里為陸涼編里八西北七十里為馬龍編里四東北一百一十三里為霑益編里十四自府至省三百三十里

潯江府

在省之東南其地東界廣西之潯勒二百里南界腹安之寧州九十里西界雲南之晉寧二十五里北界宜良五十五里附郭縣為河陽編里六東一百三十里其州為路南編里四東南九十里其縣為江川編里二西一百二十里其州為新興編里二北四十里

其縣爲陽宗編里二自府至省一百二十里

蒙化府

在省城之西其地東界大理之趙州四十里南界楚雄之定遠一百里西界順寧一百五十里北界大理之太和九十里自府至省八百六十里

鶴慶府

在省之西北其地東界北勝二百四十里南界大理之鄧川二百三十里西界麗江之蘭州二百一十五里北界麗江七十里東一百二十里其州爲順編里三西九十里爲劍川編里十八自府至省一千一百六十里

姚安府

在省之西北其地東界武定三百二十里南界楚雄之鎮南一百二十里西界大理之雲南一百八十里北界北勝四百五十里附郭爲姚州編里四北六十里其縣爲大姚編里四自府至省七百里

廣西府

在省之東南其地東界廣南四百五十里南界臨安之阿迷一百六十里西界寧州一百八十里北界曲靖之羅平五十里北八十里其州爲師宗編里十六西九十里爲彌勒編里十六東南三百六十里爲維摩編里九自府至省四百里

尋甸府

在省之東北其地東界曲靖之馬龍一百里南界雲南之嵩明七十五里西界武定三百里北界東川四百里編里七自府至省二百六十里

武定府

在省之西北其地東界雲南之富民一百五十里南界羅次六十里西界楚雄之定遠三百里北界四川之會川四百五十里附郭州為和曲編里七東北二十里為祿勸編里七西北一百九十里其縣為元謀編里五自府至省二百四十里

景東府

在省之西南其地東界楚雄三百二十里南界威遠
四百里西界雲州三百六十里北界楚雄之定邊三
百里編里八自府至首一千一百八十里

元江府

在省之南其地東界臨安之石屏一百一十里南界
臨安思陀甸二百一十里西界思倫發者癸寨三百
里北界新化州二百里附郭長官司爲因遠羅必甸
編里八自府至首七百九十里

麓江府

在省之北其地東界蘭滄之蘆蕓一百八十里南界
鶴慶七十里西界西番浪滄江二百里北界永寧府

三百二十里附郭州為通安編里十三東二百四十里為寶山編里六西南三百六十里州為蘭編里四西三百里為巨津編里六西北四百六十里其縣為臨西正統中廢自府至省一千二百四十里

廣南府

在省之東南其地東界廣西之泗城州一百二十里南界古器野六十里西界維摩州一百五十里北界泗城州二百四十里編里六東二百里為雷州編里四自府至省八百五十里

順寧府

在省之西其地東界蒙化三百八十里南界孟定五

百七十里西界永昌三百五十里北界永平三百五十里東三十里其州爲雲緬里四自府至省一千一百五十里

永寧府

在省之北其地東界四川鹽井衛三百里南界蘭滄之浪蕩二百五十里西界麗江之寶山一百里北界西番三百三十里緬里四東北二百四十里長官司爲刺次和西北一百二十里爲韋甸北一百五十里爲香羅二百八十里爲尾魯之自府至省一千四百五十里

鎮沅府

在省之南其地東界者樂甸二百里南界威遠州三十里西界景東三十里北界楚雄之南安三百里編里五東北二百五十里長官司爲祿谷寨自府至省一千二百里

北勝州

在省之北其地東界姚安之大姚四百里南界大理永寧二百一十里編里十五北一百八十里其州爲滾葉編里三屬衛自州至省一千二十五里

形勢

全省

有天下之形勢有一省之形勢有一郡之形勢孟子
所謂地利山谿之險也說者謂燕如首西北東南如
二肢西南如足必足無肢盤然後能奉其元首繇是
廣之則之有會之視列即矣漢史傳西南滇國最大
今爲行省以滇爲上游顧袖諸城所從來也雖無山
河表裏之固江湖襟帶之雄然南山之頂北顧東川
金沙奔流遶其麓而行至於蜀之戎湖曲州靖州而
外峻嶺千里受蘭洽之水以達粵西庶幾乎此方之
襟帶而表裏乎譬如人家宅舍左右前後比屋而居

者皆足爲我倚託舊志又謂東以曲靖爲關霑益爲
蔽南以元江爲關車里爲蔽西以永昌爲關麓川爲
蔽北以鶴慶爲關麗江爲蔽東北貴州西南陵趾西
南緬甸西北吐番又謂八百老撾交趾諸夷以元江
臨安爲鎖鑰緬甸諸夷以騰越永昌順寧爲咽喉吐
番以麗江永寧北勝爲阨塞此又繇室而堂而重門
而屏蔽以成其爲安宅矣

雲南府

十二城爲城滇池爲池東眺則諸峰羅列梁王以名
其山限以俞元曲州拄笏高透迤而西真連羅婺
之境金沙隨流守在此岬勿使長江之險與彼共也

修于疆理皆樊圍隲戶之奧區詰爾戎兵焉設伏出奇之要領

大理府

點蒼之峯十九配以溪缺隄其一豈地不滿西南半阻以迴巔緣以漾澤頸以石門鎮以鐵柱北跨洱河首南濔洱河尾當時南詔據此自謂萬世利然天兵如疾雷迅風實隸此山之陰彼夷王者直相其面未相其背耶

臨安府

東距石巖山峭壁千仞下有受水岩洞合玉河之水匯爲一泓折而入西阻華蓋連岡疊嶂綿亘數百里

爲郡城右臂南距煥文高挿雲漢三峯矗矗瞰諸山
如部婁其麓有河北跨曲江流沙湍急如坂上走丸
距箐口五里險隘可恃以固

永昌府

而極南隅界華夷於一綫豹閤虎旅咸控引於重門
有三崇山之危峰有蘭滄江之巨浸是以岳鳳就誅
不但縛中行而苦其背多首見告旅自取也首而陷
其胸乃遠者六慰三宣藩籬盡撤近之八閩二堡荆
棘如林勉稱三地守戎勿以萬夫啓鑰要使百昌永
逸無痛補牢之脫已矣

楚雄府

東距祿豐之響水關祿豐有營有兵而郡縣咸賴之
西抵定邊方緬岳連兵時定邊令以羽書乞兵守其
地謂

國初緬人入寇不繇騰永直走定邊蓋前人大候州
一帶岐路多也又自謂遠達鎮南之策應迤邐蒙氏
之挾援鞭長馬腹固然矣南連者衆甸諸夷虎恃險
遠不可化服北接金沙黑水爲武定之咽喉當時所
稱山路之險雖又久而迷索哉扼四塞而圍萬全在
講求之耳此當時掌故目擊之言而前志所未及者
信書百聞資以一見故足述也

曲靖府

四封之山謂青龍負金勝峰自東自南自西以爲固
而北據白石之江當一面之阻控制二翼前志所稱
如此至於今日則平夷以東霑益以西夷志震隣二
方輒俱蹂躪頃者交水建城矣平夷城郭人民如故
矣天兵西向霑益收復有期幸哉此郡不爲鎗而守
乎

潞江市

是名江城而三隅負山一隅臨水金蓮山在郡東玉
筍山在郡西羅藏山在郡北撫仙湖在郡南州邑四
城各守其境以衛郡治原非用武之地足稱饒沃之
區

蒙化府

以東南西北次第區分有按昆彌之渚有畔威楚之鄉有枕蘭滄之濱有跨黔蒼之麓者就中威楚之鄉爲定邊蘭滄之濱爲順大彼疆此理勢異情殊猛虎長蛇朝乾夕惕抑期地也首六詔以稱雄標奇王曰蒙舍而巍寶山寔其耕牧巉岬圖稱爲都會險固形勢蓋可知矣

鶴慶府

洱水釵川有左江右湖之勝立塘蒼洱爲汴流枕石之形其達之屏蔽者如此至於疊嶂平原可戰可守強夷悍卒可兵可農禦侮於近地者四十有八區是

以西事類仍惟鶴川安枕獨也

姚安府

崇山修谷平疇廣川各居其平寔六詔之中分滇蜀之要會洎宋唐以逮勝國皆繇此地而南志武征蠻駐茲籌筆專以滇中西北論門庭鎖鑰非此不可其他烟蘿金秀青蛉蛟江又皆選勝之壯觀矣

廣西府

諸山環峙為屏八甸縈溪為塹比隣廣源密邇交趾雜夷四姓守在四隅內屬兩州勢如兩翼雖非要會之地亦閩夷夏之交

尋甸府

地連中慶壤接曲州果馬月孤咸稱戰地雖平原若
沃饒之壤而卑下寔阻濡之場況東川盤據負隅於
北塞獨當一面

武定府

擁烏蠻之固據獅子之威我

建文君嘗潛隱龍魚昔南詔時亦偕封秦岱江關之
表其族類寔繁有徒數十年來凡弄兵一再見告乃
知地形一也常在我則勝筭隨機一不戒而倒持難
御

景東府

邦泰孟沼突兀於東南景董鶴籠遠迤於西北大河

源夙名水寨沿江路長抱山根自非懸索爲橋卽使
怒飛難渡在區內雖非要會之樞捍窮荒可稱控搏
之所

元江府

蘭蒼禮社陰槐江閣棲霞玉臺雄稱山峙衆人善戰
南向而牧馬者誰居狼望無虞知雄而守雌者皆是
雖有車里爲蔽可無是郡爲閫

麗江府

雪銷春水遙連西蜀之偏鱗次碉房直接吐番之宇
語天塹則金沙黑水論地利則鐵橋石門荒服商夷
於焉樹塞西方佛地是爲通衢土司之富

國家無所利焉自守之虜門戶借之局矣

廣南府

崇崖巨壑峻陴深林一夫可當關四馬難容竝駕
雖此日富州交趾所在構兵然異時外攘內安可幸
無恙在此也以廣以南名其郡距彼也與廣以西通
其都在昔也不過臂指之區在今也足當咽喉之地
卽落落難合者皆於無隣茅源源而來者業已知市
順寧府

衆山環遶於西南一江襟帶於東北雲州雖彈丸有
建瓴之勢三旬如鼎足分犄角之形袁牢傳南齒寒
無慮陽瓜蒙舍輔車相依往者庸蜀竝驅曾聽孟津

之約誓今幸江山如故永爲南鄙之藩籬

永寧府

大江自東北一瀉千里向東而去其水即鹽井衛之山也餘三面者深山密林亂流雜派郡治如斗大稍稍平行一無城郭宮室矧曰百官有司土司亦不居也居於遠山前志紀形勢似閣筆者唯安棟考云地廣人稀非楚則蠻遂跣強驚與番爲隣然則天地之外又有以人爲險者乎

鎮沅府

是郡蓋緬甸之織路而元江之隣壤也緬人近罕公戰而那氏實多私聞不言中國之利唯有調停而已

至談地勢亦曰依山爲郡傍水最居噫葆就羈縻之說於此地用之爲宜

北勝州

列岫自畫圖而出長江儼東帶而朝其流溢則隸西而南隸西南而東北枕嘉峽抱金沙控吐番評其地也又云土狹而饒兵悍而勁隲其人也則此州非特地可耕而其民亦可使矣

山川

志山川者點綴不數語而盡融結之奇然豈徒供
遊目者騁懷已乎有可分疆域者矣有可覘形勢
者矣有可稽勝蹟者矣有可寓物產者矣錄中土
及荒甸某水某丘某城之外某方及相距地里之
數備書焉良以多事之秋或為用武之地耳不然
比於嚼蠟徒費紙墨為

雲南府

凡部志宜詳通志宜簡是矣而會城無志統於省
志雖詳可也會城山川亦廣矣而前志所入不過
十之二三夫山水佳處共見共聞必非浪得名也

況此郡於前代不在六詔中當其時僭擬名號而金碧不受五嶽之封渙池不與四瀆之祀亦云潔矣山靈顯見抑自因其時耶一丘一壑可枕可漱可施七尺者名人品題皆錄其實今不忍令其泯泯無傳特增益而備書佐樂遊者指點云

府城北二十里曰岷山一曰高山俗又稱蛇山隸東北而來以開西南溟之望也其高數十仞多崖穴卷石撮土可刊爲洞隱可誅茅爲室枯槁所居又多藥草紫芝黃獨之屬有泉焉可取以浴可以已疾樵歌牧唱谷神應之如響其下多桃花林其新柳碧蒨相錯而成景秋冬之交時苦野燒相傳負鹽出井之地

潛使人爲之此山焚而斥鹵盛不敢知也前志首碧
雞金馬而此顧寥寥蓋入品藻必先名山耶

漢書地理志陝在滇池之來惟山楊太史謂在今
羅次縣謬爲沙龍今二山不載舊志

繇南山而南其山曰螺峯滇城北郭倚以爲枕睥睨
占北山之陰其崖曰盤坤曰補陀羅曲磴躋攀而上
多奇石其特立可徙倚而遲月者曰明月石江陵張
楚城藩伯題其麓有二洞曰潮音曰幽谷皆有景見
別卷

繇螺山疊嶽而下曰五華山喬林葱鬱管領衆山咸
在仙掌之上厥土赤色可以煨金海外百里爲晉寧

其山聳拔相向取以爲賓山

祖遍山在五華之左竝峙城中

碧雞山在郡城之西滇池之外一統志云蒼岩百仞
綠陂千頃月印澄波雲橫絕頂可以觀茲山矣

錄碧雞而西南曰太華山在西山中如笏如冠玉左
環右擁蒼秀而端嚴

錄太華而下曰太平山可望滇海

太華之左爲華亭山遠望微覺欹斜而迥然獨秀登
臨乃知之

卓立海岬者曰羅漢山山分南北庵其南峭壁千仞
時見白雲依危石而飛其北夷險相埒每一游目華

綠海一方耳

碧雞閣下曰高峽山昔楊莊介公僑寓處

沿滇池而南曰大鼓浪山小鼓浪山漁者居之

又五里許曰觀音山萬頃中一拳突起晦翁天風海濤之題可移山閣

南十里曰萬德山上有安國寺佳麗之地盤水沉澗赤甲壁山在城西十里舊稱石鼻訛也此鄉爲石鼻因以名其村耳

又十里許曰進耳山天外三峯可以閣筆故又曰筆架山

聚仙山卽西華洞在城西二十里黑林堡

三華山去聚仙山五里許龍夜迴合如掩袍袖盤峻
嶺而上其寺爲秋高其泉爲玉峯

玉峯山在城西二十里又名列和蒙山遠望其形方
廣出西南諸峯之上有石碁枰因又曰碁盤山鐫玉
案晴風四享其下有泉曰菩提泉

金馬山在城東二十里山勢蜿蜒林壑幽異綿亘數
十里至於古城乃爲息壤有泉出於山椒相傳此山
昔有金馬隱現故名

按此山又曰呼馬相傳前代取經以馬負經至此
山馬遶呼而得之故曰呼馬左思賦曰金馬騁光
而絕景碧雞條忽而躍儀又似指馬色雞羽者顏

師古曰金形如馬故曰金馬碧形如雞故曰碧雞
碧誠有之如雞未前聞也金則無矣况如馬乎漢
宣帝時方士言益州有金馬碧雞之神可祭而致
遣王褒來求即此

距金馬山三里曰鳴鳳山舊名鸛鵒巡撫晉安陳用
賓易今名因評其勝曰山光靈異景物歲徙遠之九
龍奔朝近之雙鳳翔舞玉泉環帶碧潭綰轂昏實錄
也

東北二十里曰龍泉山上有真人之宮龍湫在其下
繇龍泉而東五里曰松葉山水繇東北來者此爲朝
宗之逕路其山聯絡若十二峯當三川水口一一深

秀

文殊山在城北二十里有堂有泉皆以文殊名

在富民者曰靈芝山在邑西南二里舊名赤晟化山
東南三里曰洞口山山下有洞洞中有水縣西北傾
而入於安寧河

北五十里曰黃弄山

在宜良者曰容爭容山去城東十里為縣鎮

觀音山在縣西十里有泉出於頂今名水井山其南
山曰巖泉

北三十里曰北樂山一曰楊雄一曰寶弘

西五十里曰茨箐山

在羅次者曰玉龍山邑東南五里中有碧石竇湧水如龍

南五里曰九成山或曰九峯或曰九湧

南十五里曰崑巒山舊名穹壺有庵亦曰穹壺庵

曰子望母山其山有二一在東北四十里一在南三十里兩山相望而得名

在晉寧者曰萬松山城東五里其松皆盤曲糾纏又曰盤龍山

西五里曰金砂山山產砂石色如金

南五里曰五龍山其山多雲氣有龍湫五一名小石屏山

南十里曰光長山北瞰滇池如鏡山腹空洞扣之有
鍾鼓聲

西三里許曰海寶山下有一竅滇池水緣此泄於激
江西浦龍泉濟彼田畝昔人於山下浮橡糗試而知
在呈貢者曰萬福山縣之北山也三山相屬如台星
又曰三台山上瞰滇池風帆雲影錯落日中

南十五里曰象兔山

在安寧曰太極山城環其外如省之螺峰五華然與
虎丘連山而分歧危石屹然石上有文類古琴斷漆
梅花點點又叢株梅樹倚石而生

東十里曰洛陽山陔氏鑿十六羅漢于石壁山頂平

盤林峰峭立花如錦障下有泉流慨曰三千餘畝
北十五里曰岱晟山峰巒竝立如筆架形又名筆架
山因居坎位又名坎山

西北二十里曰葱山爲諸山之長其北復起曰鳳城
山

在祿豐西五里曰三叉和山色如翠屏

十五里曰南屏山三面陡峻峰南稍平

東北三十里曰姚陵山舊名驪踪麓蠻語呼城曰麓
群山之中一峯特出而孤秀其巔有泉古寨存焉

在昆陽北十里曰望州山其山形廻躬州治以此名
西五里曰長松山其上多松又有臥仙山一名白鳥

山

近滇池又十里曰珊瑚果山秀列三峯奇分四面
東南十里曰寶應山

在三泊西北十五里曰雲龍山岡巒聳拔四時嵐翠
將雨雲氣凝結於上

北十五里曰葱蒙臥山有漢人舊城及王仁求碑

西南十四里曰白鶴山相傳有鶴嘗巢其上又三十
里曰光燭山上有巖又有小城

在易門治北曰智勇山甚聳削

南五十里曰梨崖山挿入雲陰下有平谷

西一百里曰祿益山上有閼休土城爲昔鄒聞戍邊

之所

在嵩明治北曰蛇山形如盤蛇一名黃龍山

東北十五里曰羅錦山崖石劖篆文若錯繡下有泉
多灌溉之利

東二十里曰秀嵩山頂如偃月環州之山皆在其下
俗稱搖鈴山孟獲嘗立寨於此

國初尚書吳雲死難處南一峯曰小秀嵩

四十里曰軟霽山相傳蒙世隆代烏蒙掠其四女至
此遙望故鄉俯仰嘆息忽山巔霧結三峯巒謂三為
軟注為霽故名其山嶺萃獨峻南眺滇上諸山悉歸
指故又名峻葱山

北二十里曰彌雄山嶽蒼疊出望之蔚然土壤肥沃
一名彌秀山下有泉南流入羅波澤

西五十里曰登花山山多野花發時如繡谷土人名
爲聚八仙花

西北三十里曰東葛勒山在故邵甸縣其高三十里
在舊楊林治南曰竹雄山

東曰楊林山群峯錯列山麓有石如人立

西南十里曰烏納山周廣百餘里東西相望在呈貢
宜良間絕頂有石如馬首遠近禱祀其應如響競以
檀穢裹之土人乎馬首爲烏納故名

府城內曰九龍池清迥秀澈蔬圃居其半故又曰菜

海其平者爲稻田下者爲蓮池又半之沿五華之右
貫城西南陬入順城橋匯盤龍江達滇池世鎮有別
業在其上曰柳營

西南曰滇池周遭五百餘里又名滇南澤合盤龍江
黃龍溪諸水史記載滇水源廣而末狹有似倒流故
曰滇漢武帝鑿池於長安習水戰倣此也池北受水
而傾西南爲海口北入富民縣匯廣翅塘赴金沙江
或曰南華所云鵬海運將徙於南冥南冥者天池
也齊諧曰水擊三千里搏扶九萬里去以六月息
南冥天池即滇池也非特始於莊子實始於齊諧
見郭篤周氏環言必有所祖

西湖在滇池上流又名積波池周五里許荇藻長青
蘭橈盡舸所之多產木鉢蓮花千葉蕊分五色外豐
葭茨內阜川禽俗曰青草湖近城可一里有亭榭曰
魚池寔蓮池也顏其亭曰君子

東五里曰盤龍江發源自嵩明州故尋甸縣山中凡
九十九泉合流西注曲折而南入滇池

西南八十里曰海口以滇池潴諸川之水至西惟此
一河泄之若咽喉然沿海財賦歲以萬計其利害繫
於海口之通塞誠要津也歲一濬之在田賦之正供
曰海夫

西二十里曰澄清河在青草湖內七八月間潢潦汎

漲斯水獨清

東十里曰金稜河元賽典赤瞻思丁築堤分盤龍江水
繇金馬山麓流經春登里東鄉灌溉寔多堤上舊植
黃華故名今土人呼曰金汁河

西十里曰銀稜河引烏龍潭水繇南山麓流通沁浪
里南昔堤上多白花今呼銀汁河

北河存其名其實渴谷也相傳勝國時瞻氏開金
汁河成有人效之爲銀汁畝引黑龍潭水而使北
流然高不善下迄無成功後見殺

南有寶濠河源出上板橋分瀉至此注于漠池

北二十五里曰黑龍池其水深黝鯽魚數百人莫敢

賦天旱請禱輒應

又有三龍泉一出高山下傍有祠有亭扁曰第一泉一出城西勒甸村山中水分青白二色一出碧雞山下洞內產金線魚又名金魚泉

東十里又有二泉皆曰白龍

西二十里曰海源在聚仙山下其水流入清水湖爲內池滇水爲外池又曰鴛鴦池

西有瀑布泉在玉案山間流至寶珠寺後崖高數十丈泉自巖頂溪於溪澗噴沫濺珠聲徹里許多名人題詠

北有文殊泉流通松花堰又有湧泉出湧泉山寺腰

一泓清迥甃爲曲池以共觴詠

寒泉二其一在城北上莊村寒氣徹骨其一在城西高峽里普賢寺右二泉浴之皆已風疾

東三十八里板橋堡有山皆奇石兩龍湫疊出焉水由石隙接流而下爲觀音塘山頂爲真武閣

北城外二里曰蓮花池池可一里許四時之水不竭有亭臨于上祀大士

府城隍廟中有閼侯井取以沆蘇其色鮮

藩司署有青侯井昔大理高智昇鑿智昇弼清侯

螺山下有石崖井又有廣佛井宜煮茶

吳井在府治南菊花村其水獨重汲而貯之久藏而

不腐以烹茶其氣清迥其味若得水而井彌久如故
旗纛廟有石井與吳井埒以供上官

五華書院前亦有石井名與諸泉並著以在山麓民
居山岡者艱於得水功倍尋常什百矣

呵泥井在城北二十里江頭村環村而居者取汲焉
南城外有臘脂巷井作酒而美

東城外有蒿紅井可以染紅其色殷然

海眼井在覺照寺大殿內佛座下相傳爲滇池水眼
每歲佛日取以浴

富民縣東北十里曰夷扎郎水西入大溪

北五十里曰農納水源出武定府界北流入大溪

東南曰紅蓮沼矣有龍祠水上芙蓉冉冉天然清淨
羅汝有星宿河隸祿豐而西經易門入元江

宜良有盤江或曰大池江從徵江府舊邑市縣北流
入縣境盤折六十里遇鐵赤河至蓮花灘入交趾
又有大城江自陽宗東下注盤江

西南三十五里曰湯池其水酷熱如百沸之湯
呈貢縣北十里曰洛龍河源從黑白二龍潭流出灌
溉田畝下江尾村入滇池其上有天生石室

安寧曰螳螂川以水中有沙洲其形類之也源自滇
池經富民武定入晉渡河至廣翅塘入金沙江

北十里曰溫泉出石窟間周遭怪石不假甃治水隸

山中沸而上水底可拾針芥水面白雲時起中二石
深綠如玉楚黃陳余達鑄二字于上曰耳泉楊莊介
公名之曰碧玉泉謂他泉不逮也

右一里有聖水泉其水一日三潮僧戒照卓錫處
高塘坪村有龍泉流灌田畝

祿豐之河曰大河

昆陽東南五里曰渠濫川縣東北流入滇池

平定鄉小山下石洞凡三洞中有流泉曰三洞泉

三治治北曰資利河自北而南交匯於縣復北流入
滇池其縣得名以此

易門曰九渡河源出法宜入元江經蓮花灘而達於

南海

晉寧州曰大堡河源出新興州經晉寧永興鄉分注漢池

歸化東北二十里曰交七浦廣二百餘畝

嵩明之東南曰嘉利澤可百餘里多魚鰕衍灌溉一名楊林澤

一曰石洞泉水從洞中出一曰牧羊水出牧羊潭南流入滇一曰龍巨江一曰龍濟溪源出果馬山經州南入嘉利澤

西有兩泉對流曰對龍泉分流百餘步復合入嘉利澤

大理府

府諸山首稱點蒼山有峯十九有溪十八界在西關
之間條岡百里周迴萬步五月積雪皓然人取以食
山腰白雲如帶蒙氏僭封爲中嶽讀漢書注山似扶風
太乙之狀上有馮河中多白石穴而取之如切肪白
質黑章片琢爲屏有山川雲物熊唐李德裕平衆莊
醒酒石卽此產也嘗有人畊地得巨石上刻三字曰
靈鷲山

又他山曰青巔曰雞蟲曰玉几曰羅釜曰羃葱曰龜
山若拱若揖西向點蒼又多石窟

山之陰曰石門山兩壁青蒼高巖敞日長松參天深

十餘里李元陽有記

東北一百里曰難足山名山記爲九重崑岡巖奇詭
參差如難距上有石門儼如城闕人莫能通佛剎非
一其大者七十三寺仙靈所居世傳佛大弟子迦葉
波守佛衣于此以待彌勒遊人經旬乃盡其勝

考佛家言難足實在西域凡記薊皆云然此山形
酷似難足有華首門袈裟石儼然闕戶離城出世
入定之所佛力無邊豈可以方所論乎

趙州西一里許曰鳳儀山本點蒼南支如鳳張兩翼
又名三耳

東有龍伯山與鳳對南有宿龍山唐鎮南將軍建

閤于上又有五佛山其下有聖泉

三十里曰赤佛山四十里曰昆彌山西平侯更名為
定西嶺五十里曰九龍頂山遠望九峯相聚

雲南縣南八里曰青華洞濶十餘丈懸岩滴乳愈深
愈奇上有石竅曰天窓日月光照洞中其廣可促十
席

二十五里曰水目山其巔有泉淵深下有佛剎
四十里曰天花山

東五十五里曰龍洞中涵巨浸流灌田畝其出遂以
待遊人

西二十里曰龍興和山

西北二十里曰九鼎山舊名寶泉山其山有九頂故
又曰九頂載名山記九峯相並時問仙樂巖有九洞
一洞有石佛五軀上有九頂寺

鄧州治曰象山東北曰卧牛山七里曰東山狀如
獅子吐舌下有龍潭可以禱雨

東南曰禹勝山形如孤鸞高塞渾河爲襟帶渚嶼漾
洄波光激濫

北八里曰鍾山昔鄧賧詔避兵居之

在浪穹縣曰方丈山東二十里曰靈應山巖至有像
禱雨輒應曰天馬山上有鎮蝗塔

東二十五里曰佛光山巔然險絕山半有洞可容萬

人

本朝征普顏篤於此山後克嶠城僅容一人行名爲
一女關

西曰寧山形如鳳翼

西南三十里曰鳳羽山舊名羅浮山蒙氏細奴邏興
時有鳳死此山九月百鳥咸來啁啾哀鳴土人以火
取之多得異禽故又名鳥弔

北二十里曰罷谷山水經云罷谷之上洱水出焉其
山空洞流傳以爲蘭滄江之狀流

三十里曰梁王山爲元梁王行宮今掘地嘗見琉璃
瓦

東北四十里曰蒙次和山三面險峻一面臨河六詔
時施浪詔居焉曰蓮花山狀似蓮花其山麓有浮圖
傳云唐三藏法師所建以鎮紅孩兒之恠又有洞山
洞中池水承岩溜滴下若方響聲

賓川州東曰鍾英山去州百里產竹箭饒鳥獸毛茸
之利西五里曰筆架山麓如書案饗宮向焉

南二十里曰畢鉢羅密山距白崖川西一名賓波羅
密巖巖巒聳拔十餘丈其下林麓蒼鬱南詔時有拉老
蠻者即崖而寺之上有摘木仙橋其木非常每月十
五夜橋木自換又有奇樹名菩提樹亦名思惟樹面
陽雜俎云畢鉢羅樹出摩伽陀國

西南四十里曰烏龍山東麓有白塔其北多奇石空
竅玲瓏上有大王廟又名奇石山又有觀音洞自然
石大士現像莊嚴崢嶸奇詭不可名狀

西北四十里曰翠屏山蒼翠橫列如屏

雲龍州西五里曰三崇山壁立萬仞人跡罕到有行
至半山者遇烈風雷雨砂石而止或云即古三危山
府諸水其首曰西洱河杜氏通典名昆彌池亦名瀾
海即水經所稱古葉榆水也源出浪穹縣罷谷山下
世傳黑水伏流別派自縣西北來匯於縣東為巨津
形如月生五日抱珥之狀故又曰洱河遠縣西南蘇
石穴中出又會蘭滄江而入南海水中有三島曰金

梭曰赤文曰玉几水涯有四洲曰青莎曰大貫曰鶯
鶯曰馬簾九曲曰蓮花曰大鶴曰蟠磯曰鳳翼曰蘆
蔣曰牛角曰波峽曰高崑皆可田可廬而大鶴洲隨
水升沉如世稱鸚鵡洲然

又有十八溪源自熙蒼山椒懸瀑注下而成曰南陽
曰葦冥曰莫殘曰青碧曰龍曰綠玉曰中曰桃曰梅
曰隱仙曰雙鴛曰石曰靈泉曰錦曰芒湧曰陽曰萬
花曰霞移溪各夾于十九峯中所經皆宜灌溉同入
于沮河

瀑布泉在應梁峯之南澗即梅溪秋夏間爲瀑布下
有拗堂拗中有一激石其大如馬水激石跳鏗錫如

雷

翠盆水即清碧溪在馬首峯之南峪有三盆澗水三
疊翠碧交加

有救疫井在點蒼山下疫癘者飲之即愈

府城北有井曰藥師井取以造紙其色瑩然

雲龍州東二里曰蘭滄江即黑水也書曰華陽黑水
惟梁州源出雍州南吐番鹿石山本名鹿滄江後訛
爲蘭滄今又訛爲浪滄自麗江經州東南流入永昌
炭化順寧景東元江交趾達南海

按地理志謂南中山曰昆彌水曰洛山海經曰洱
水西流入于洛故蘭滄江又名洛水言脈絡分明

也詳在郡志

禮社江源自趙州白崖至楚雄合蘭滄江

又有毘雌江出蒙化之巍山合禮舍赤水二江經元江入于交趾

又有赤水江源出定西巔

賓川州東北曰金沙江水經注所謂若水是也

又有孫水即金沙江之別流水經注曰白沙江司馬相如定西夷梁孫源即此水也又南至會無入若水按注若水南經雲南遂文縣即今有屬金沙江巡檢司地也繩水孫水淹水瀘水大渡水諸水沿注通爲一津即若水也東流注馬湖江諸葛武侯南

征渡此

又有七溪曰鍾良曰銀曰石寶曰寒玉曰通源曰赤龍曰豐樂皆以灌溉而豐樂爲最又有河曰納六又有湖曰上倉在九曲山之南周遭十里中產魚味美又產蓮花菜

又有大河出梁王山合竹泉橫溪二水經州界北至金沙江

賓川州西百里曰金龍湫在洱河之東林木茂密泉深混混行通過之悚然

州西南五十里曰烏龍池居民作堰以灌田

鄧川州西二十里曰南詔潭潤十餘里其深莫測三

山環峙萬木陰森一面有石牆爲昔人避安處祇今
歲旱禱焉

州東十里曰星鯉泉源從山麓石岩下湧出注爲池
其魚類上有一點如星灌慨甚多

州北七里曰綠玉池南十五里曰上洱池

南二十里又有油魚穴魚僅長三寸中秋而肥十月
望後而絕

又有羅時江亦南流入洱河知州周之相奉巡撫沈
傲灼開河尾一道新墾田畝賴之

趙州九龍頂山下曰大江又名波羅江北流入西洱
河卽州之帶水也

雲南縣南三十里曰葉鏡湖中有石若鏡

西南一里曰清湖其深莫測永樂七年黃河清此水亦清迄今遂不濁

西三里曰溪溝源出寶泉山下入定邊縣界夾溪十里花卉繁茂又名萬花溪四時皆可遊

南四十五里曰珍珠泉湧泉如噴珠雖膜不竭

東南十里曰青龍海水涯出入自金龍山望之頭角皆具宛若游龍

東北十五里曰周官夢海又曰小蒙舍海

蓮花渠在縣東和甸廣二十里中有二島島上有菴東五十五里曰龍洞疊嶂層巒中涵巨浸

浪寧縣北曰寧河卽一統志明河寧湖也出罷谷南
曰蒲陀江出罷谷山注于西洱一統志訛爲葡萄江
東十里曰大營河源出羅舍河流至水皮村與寧河
合

西百餘里有上下江嘴堂水流折旋處若江口然乎
由劍川經漾濞合洱水而入蘭倉

又有九龍泉在佛光山下泉有九孔俱自石竅中通
出灌溉賴之其水會入寧河

西又有龍池俗名魚子湖水色青碧

十二閘有一泡江在司前流入金沙江

龍潭有三曰乾龍在乾海子峭曰紅雀在龜山東西

火龍在石鍾寺側

溫泉鄧川有十所曰通和曰洗心曰脫塵曰起病曰

大澗曰上登曰龍馬曰香曰豐曰歟

趙州賓川雲南縣皆有之

若浪穿九氣泉為最浴之可愈疾

臨安府

南二十里曰連雲山時有雲氣在其上

三十里曰煥文山峻拔冠諸山三峯蒼秀以二十里

外山影倒入泮池一奇也舊名判文山嘉靖間學使

趙維垣更今名

東十五里曰石岩山下有岩洞又稱顏洞以遷客顏

際所闢也原題七遊今其洞有三一曰水雲門前虛

厥可容數百人瀘江中河之水赴以爲壑架橋列炬
而入洞中石乳下垂又有石作大士像山水迴合幾
二十里一曰南明上有兩竅陽光射入見石床丹
從此愈進而景益奇一曰萬像山更峻絕礚石磴數
十級隱隱聞風雷聲石液凝結若觀鵞亦曰句町二
洞云

東三十里曰捧印山有石方如印西曰鷓鴣山四十
里曰華蓋以形似之

北三十五里曰晴山一曰北嶺山勢嵯峨林木葱蘢
晴嵐映帶如青芙蓉蓋一郡主山也

西南二里曰寶山夜望有光三里曰樂榮山其土香

膩炙餅可食

東北曰回龍山蜿蜒數十里矯若游龍東南曰炎和城山林整蒼蔚如畫

西北曰豐山地肥草茂

十里曰火焰山有熱氣蒸柴履之灼足著枯葉輒焦人卧其上可以去疾

東北八十里曰三台山俗名三尖山羊腸一線而下有舊梁王城夷寇恃陰標掠四出稱淵藪焉

在百里箐口曰石門山鑿石爲門以通車馬下臨曲江險隘可守

五十里曰翠屏山獨秀無競

石屏州五里曰乾陽山佳木蒼翠上有石洞

東十五里曰萊玉山有石類玉其色碧四十里曰海東山西三里曰蓮花山下有蓮池東南曰雲台山產異石

南二十里曰鍾秀山高三百餘丈綿亘百餘里中有紫石質細而潤可琢爲研聞有綠條金線者爲佳然未始見也

阿迷州東十五里曰烏克山東南曰雷公山巡撫鄒應龍東征忽雷擊遁賊于此

一百四十里曰傍甸洞有風雷聲人不敢近東南有通靈洞火觸有聲

西北一百八十里曰蓬和山西五十里曰觀音洞內
有石像

西南二十五里曰傳聲洞有石如席上一小孔嘘之
有聲常有蛛網封之

寧州東九里曰萬松山多松林東南二十里曰登樓
山高可千丈頂有池蒙氏僭封爲東隅之神山左曰
陽暮山一名龍洞山腰有三洞上洞空洞高廣如大
厦深入莫測巧石盤紆持炬行數里至木梯處人多
不敢入中洞愈廣潤有石如佛像者甚多下洞有溪
泉湧出擾多魚鰕冰去來無時一歲中常一再至夕
陽天景紫翠萬狀

在憐梁鄉一百三十里曰木角甸山舊出蘆葦石封
閉年久州人不知嘉靖乙卯開局鑄錢物色得故地
取石入銅

在老寨後曰西沙麓山土語城爲麓相傳土酋西沙
所築

新平縣南三十里曰鎮元山五十里曰金營山舊丁
苴地

二百里曰南銅山有七十二銅西一百里曰倚樓山
可行一日程崇巖峻石若樓閣憑虛

新化州北五十里曰微崇山林木蒼然北百里曰磯
閣山有五峯俱秀特

通海縣東南三里曰諸葛山若瀘河間稱大小相巔也

南六十里曰秀山下臨長河

河西縣五里曰螺髻山頂如螺髻前有池多蓴螺東北曰礫礪山四圍皆水北曰琉璃山西曰普應山十里曰佛光山形圓如佛光東曰翠微山

增峨縣南二里曰桂峯山上多桂樹東北二里曰增峨山東北二里曰龍山向桂峯而立

西南九十里曰五鳳山五峯聯翩北曰翠秀山擁縣治

西有筇川洞又八十里有鳳山洞

又十五里有三元洞兩山相對若兩門中有三層光
明透徹惟中央者稍暗耳奇石異狀下如田疇一水
貫穿涼沁心骨

蒙自縣西三十里曰目則山橫列二十峯多巉巖
東三十里曰雲龍山九十里曰美稟山多石筍其下
平曠

西五十里曰鸚鵡山又有奇木嶺

東北三十里曰耳羅山峯頭風雨雷電輒兆豐年

仙人洞有三一在河西溫泉下有石門二其石如獅
亦如象一在蒙自東四面石壁懸注如鍾鼓一在納
樓東北流泉湧出中隱隱有聲如呼雞犬者

府諸水首曰牂牁江

按舊志牂牁江在烏蒙界有牂牁太守陳立祠莊
驕留王滇池置且蘭牂牁國漢立牂牁郡

城南曰濶江其源出石屏州異龍湖東入河達州南
爲樂蒙河入於盤江

曰草海曰白水河與草海連南十里曰甸尾龍潭二
十里曰黑龍潭

府東北九十里曰曲江源出新興經增峨河西入盤
江夏秋水駛潰決而南洋洞可畏

東北二百里曰盤江源自新興經阿達合衆流入廣
西府

西南曰中河源出塔衝瀕河之田向其利

南曰小河源出蒙衝與瀘江匯流入於岩洞

西二里曰蓮花池

北曰北溝河源出甸尾會於瀘江俗名窪溝

西北曰龍潭上有龍祠請禱必應其水灌輸而入田

東北四十里曰冷水溝請流不竭灌漑甚多

城南曰建水池碧如拖練

十五里曰渾水塘二十里曰清水塘

城東南之泉曰有本解曰其流常也東曰混混井而清取汲衆也又曰溥溥可取作酒又二里曰淵泉其味甘也

城北曰聖母泉潄泓不涸左有聖母祠祈嗣者禱之
得白石而生男

東北三十里曰香林泉源山巔味極清美

城東曰玉潔井民資造熟

南曰龍井正旦日水上潮有二魚人利見之

白鶴鋪有白沙井

石屏州東曰異龍洞有九曲周遭一百五十里中有
三島小島名孟繼龍有蛇蟲不可居蠻酋昔日流放
有罪之所中島名小末東大島名和龍湖蠻城在其
上名水城四面皆巨浸

二里有大小龍井二井相連會流入異龍湖

西日月地形如偃月八十里曰矣落河源出元江流入虧容甸

阿迷州有三江口昔僕智高竄入大理路曰靈泉在州西一里曰冰泉在州四里水冷如冰

曰桑蒙河源出異龍湖會盤江下廣西府

曰摩汝勒江源自大理白崖流經州東南八十里入元江秋潦有瘴元史以爲鹿滄江

州北二十里曰盤江河源自新興州經建水衆流所會瀾漫浩蕩爲阿迷彌勒分界處

寧州西南三里曰沅江源從青龍潭流下江岸綠樹陰森可憩

西南四里曰高河外窪中窪不溢不渴

州南曰瓜水浣江之流北經恩永山過下矣衝南會
茶部衝形如瓜字故名四里曰恩永河舊名海眼泉
東北十里曰巔岩泉兩岸相對岸上泉落如飛瀑下
注溪澗又有溫泉出海口山海眼中熱如沸湯秋冬
之交人多浴之

新平縣東十里曰平甸河衆流所匯五十里曰大羅
河洪勢滔滔熱

西一里曰洪本泉邑城內外皆流灌焉

治一里許有瑞水井其味甘冽出於木下其水一本
三幹異花異葉亦異品也

通海縣北三里曰杞麓湖周廣八十里河西流注於此如環而缺其東南相傳昔遇水泛漲有僧以錫杖穿穴洩水云

東南二十里曰東湖池西曰西湖池皆蓄水灌田曰洗鉢池在秀山下曰碌碡河自水磨村流注縣境入杞麓湖內產魚

西南十里曰九龍泉昔有秘密僧見九頭龍咒降於此

南六十里曰判府泉曰秀山泉俱在秀山下

河西縣北百里曰煉莊河源出勝卽多魚蝦味異他產

東曰東渠河源自北山澗中流入通海

西四十里有浴泉浴之愈疾

增峨縣東南一里曰合江流二水異源一自新化流至縣北爲大河一自石屏流至縣南爲小河合流入曲江西北二百五十里曰丁癸江源自三汊流經丁癸其水深闊洶湧剡木爲舟以濟

蒙自縣東南曰梨花江來自元江經納樓茶甸至縣東入交趾清水江

五里曰浴泉縣人往浴七里曰倘甸河
南曰草海曰新泉

東四十里曰矢波海出魚蝦海菜

西七十里曰卡甸河源發判山

西南二十里曰西漢分而為二出銀錫礦

西北二里曰龍羊泉

納樓西南八里有曲通山泉二其一流入祿豐江一
入石洞

三部西南三十里有魯部河源自禮社江經司境入
梨花江

虧容甸有禮社江經司東車人寨出寧遠州

永昌府

城內之西曰太保山高數十丈橫二里許巍峩東南
山巔平廣可習騎射嘗有掘地得巨磚甚多俱有泉

好二字舊傳以爲武侯所遺林木蒼翠足爲奇觀
山後曰寶蓋山爲太保祖龍山勢獨高出衆山之表
群峯疊疊若翔舞而下

山右二里曰梯山山左曰玉壺山有石竇流泉甚清
每白雲從澗底起漸穿松際直掛山椒如玉壺然
西南十里曰九隆山在龍泉門外一名九坡巔連亘
十里高可百丈世傳九隆弟兄居此

西七十里曰石子山百里曰瑪瑙山產瑪瑙石山之後
曰茶山

東二十五里曰安梁山訛爲袁牢孤峯特峙如拱揖
高三百丈侍從多石皤皤焉

東北三十里曰鳳溪山上有呂公臺四十里曰天井山岡陵四圍中有平陸可居

南十里曰法寶山盤礴隣九隆一河限之昔異牟尋建寺于此又五里曰卧獅山以形得名下有洞曰芭蕉廣二尋高稱之深五十步石乳下垂洞南曰官市山

東三十里曰筆架山五峯突起如五指然又十里曰映日山有石洞焉廣二丈一郡諸水所洩伏流地中達于施甸枯柯入蘭蒼江又多魚亦名魚洞

北八十里曰靈鷲山高如寶蓋其巔有寺山間產茶稱曰本山茶香踰諸品

十里有棲賢山又有白龍山漢時有白龍之祥即詩人張含常喜詠之

二十里曰虎嶂山下有溫泉

二十五里曰雲岩山高百丈岩深處一橫石好事者鑿爲卧佛以觀寺三十里曰石澗山

八十里曰羅岷山岩高千丈表四十里蒙氏時有僧自天竺來者名羅岷能作戲舞術山石亦隨而舞迄今岩下時有飛石過者驚趨相傳人于將曉時見石自江中飛上霧表

八十五里有風洞風自洞出四時不息

騰越州東五里曰球球山下峻上平正統間麓川賊

寇邊守禦官軍居此立寨軍民潛避其上因又呼為梗寨

十五里曰馬鞍山十八里曰巔峻山六十里曰橄欖坡產橄欖

百二十里曰高黎共山舊名崑崙因夷語訛為高良公界在潞江龍川江之間蒙氏僭封為西嶽山極高峻絕頂有泉分流而下又名分水嶺

南四里曰來鳳山茂林修竹每曙時有嵐氣鎖之上有神祠為唐杜光庭子死於此廟祀之六十里曰半箇山懸岩削壁以限華夷

西南十里曰桴鼓山孔明駐兵桴鼓其上

東南二十里曰羅生山峯巒千丈林木森茂

西十五里曰馬鞍山二十里曰附丘山三十五里曰
緬箬山百二十里曰阿幸山

北十里曰下干我山又二十里曰土山上有池周五十
丈池旁有圓石一九大尺許舊傳高僧摩伽陀所遺
天旱禱雨以此石浸龍池雷雨輒至名曰濟旱石
二十五里曰上干我山上有金塔坡昔有異人修道
于此至今無蚊蚋霜雪

三十里曰龍從山雲合即雨

三十五里曰打鶯山春鶯多集于上

九十里曰雪山縈蟲三峯上多集雪

北三十里曰小甸山山徑險巇絕處以木爲棧

二百二十里曰光明山上有銀銅二仆

永平縣西南三十五里曰花橋山高二十里許上有
錢仆

西十五里曰博南山一名金浪巔俗訛爲丁當山楊
莊介公正之陟降約三十餘里崇峻峻坂率曲峭峻
爲西郵通衢昔蒲蠻出沒之所

東七十里曰寶箴山一曰觀音山武侯南征大兵至
此山路迷遇一老嫗呼大從絕徑中出始得路及兵
旋視老嫗已亡所在矢蓋應身也因建廟于上至今
流傳爲大士敬焚之所

俗曰娘娘
叫拘云

東百里曰羅武山山中流泉爲勝備江之源

百三十五里曰橫嶺山

西三十里曰和立山高千餘仞盤迴五十里亂峯入

雲遠近屬目

北八十里曰羅木山西臨銀龍江

東北三十五里曰萬松山蒼龍鱗骨覆地參天

北三十里曰繡嶺山春時山花燦爛錯焉如繡

西北三十五里曰七盤山

鎮姚所三十餘里曰茨竹坪山路極險按猛波羅界

施甸東南二里曰房岩山其東有摩蒼山西七里有

石樹山

二十五里曰當歸坡產當歸甸頭之南曰碧霞山

府城內曰上水河下水河源出九龍池及寶蓋山等
合流入城經委巷達東河

東五里曰青華海諸水所匯廣十餘里有荷花紅白
二色最盛

城內西北亦有荷花池滙仁壽泉水

龍泉門外曰易羅池泉噴九竇堯以石內種荷花西
曰噴珠廣五丈其流溉田

北五里曰響水灣懸岩瀑布響振林谷

三十里曰龍王泉源從石穴湧出流經義卽村爲義
卽河合清水河入峽口

五十里曰清水河出甘松坡下流通清水關合于鳳溪入峽口洞

北七十里曰黑龍潭八十里曰蘭蒼江在羅岷山麓漢書所謂博南蘭津是也廣可二十餘丈深莫測東奔流順寧達車里入於南海

西北八十里曰上江

南百里曰潞江舊名怒江源出雍望經安撫司北兩岸陡絕瘴癘甚毒夏秋不可行蒙氏僭封四瀆之一東北百二十里曰沙木河源出順寧興山澗水匯流三十里入蘭滄江

東南百里曰雞飛泉有石洞洞旁二泉一溫一涼清

瑩見底爲諸泉之冠

安樂山上有金井一名壬池居民視井盈縮占歲豐歉下亦有泉曰玉泉一溫一涼中產此目魚

靈巖山下有卧佛池止水清澄可辨形色

府學前有青雲井雖旱不竭法明寺有井二皆煮茶經宿無翳

騰越州西南曰大盈江一名大車江其源有三一世赤土山流爲馬邑河一出龍嵒山流爲高河一出羅生山流爲羅生場河流經城之東北而西三水合於江故曰大盈南入南甸小梁河至于崖爲安樂河西流匯攢榔江

檳榔江源出吐番遠金齒楚夷界經干崖阿昔甸合
大盈江入江頭城

曰疊水河亦大盈江之派山麓斷崖百尺急水奔飛
怒雷翻雪行者竦觀

曰龍川江源出我昌蠻地七載甸遠越甸經高黎貢
山北有渡口下流至太公城匯于大盈江

又有麓川江源出我昌蠻界經騰永中高黎貢山下
由芒市孟乃甸入緬中

治南有大車湖在圍城下湖面廣濶中有小山遠矚
如畫

北七十里曰半月池周五十丈百里曰固東河又西北

二十五里曰澄鏡池在上于我山周五百丈環以花
卉人至則雷雨交作或曰有靈物潛焉

東曰珠玕泉有二穴注爲伽河池

高黎貢山頂有分水泉昔有神僧憫行人渴卓錫成
泉

城東北隅有香泉井馬場村南有馬場泉

永平縣東曰銀龍江源發阿荒山麓經打牛坪諸寨
達蘭蒼江東下一名太平河孟冬時近曉有白氣橫
江上下充滿月色相映盤旋如龍

八十里曰雙橋河源發上西里泛于黃連堡東二里
許匯諸澗水入勝備江

東北五十里曰九渡河源發勝構江上跨九橋

又有溪碧江源發釵川經趙賧過蒙舍達于平坡會
四十里山溪合流

百里曰勝構江源出大羅黑麻山流經縣東南合九
溪雙橋二河達蒙化入溪碧江

西四里曰桃源河源發和立山入銀龍江

西南三十五里曰花橋河源自博南山不入銀龍江
北三里曰水里場河

西三十里曰曲洞河南有溫塘四時咸浴

又有薩佑龍潭三所

施甸長官司東南二里有小羅窰池河源自秀岩山

下流經峽口入蘭滄江

溫泉有四一出緬菁一出大洞村一出羅左村一出馬一村

楚雄府

東曰慈烏山城踰其上

又三里曰平山

南曰鴈塔山伏郡學之前如几案

西曰峨嵋山上有峨嵋石形如屏高可八尺驛因得名

稍左曰鳴鳳山蒙氏景莊時曾有鳳鳴於上

又十里曰臥龍岡上有盤石裂隙內一物如蛇隱見

不常

二十五里曰薇溪山其高千仞峰巒百餘溪箬有泉
分流三十里匯入臥龍山

三十里曰紫溪山在薇溪山右林木蘄森迤

北五里曰錦囊山形如錦囊布地

廣通縣近治曰東山南曰和茶山與阿納香山東西
相連而並立

東三里曰高塋山元時有塩井建塩司於此又名塩
蒼山今廢

東北十里曰鶴蕭山山形如鶴環遶縣治交會大河
接壤武定樵牧樹藝居民利之按鶴蕭者曰瑞龍山

以其蟄盤曲而名

西一里曰鳳山形如飛鳳陰雨初霽若有羊在山間者居民時或見之咸曰仙羊

二里曰營盤山武侯征孟獲駐兵於此

十里曰回磴關山相傳關羅鳳侵雲南至此值雷雨而回故名

四十里曰翠屏山蔽縣治

五十里為羅苴甸山平原沃野四山環峙一縣物產公輸此出大半其東有臥象山形如象眠大地銀仆出焉

北七十里有龍街洞洞中聞笙簧之聲

定遠縣東三十里曰石門山

六十里曰玉壁山山色如玉東有鳳羽山南有芳者山北有絕頂峰皆丹巖壁立高出群山之表

又有獨立山一名破軍山世傳孔明過此吳之抵斷其左右山畔有酒井今竭

近琅井者曰筆架山環黑井者曰金榜山

西二十里曰赤石山山多赤石林木幽阻其東有泉下流爲寒川又有雲龍山一名伏虎菁如虎盤據可六十里許

在紫甸鄉曰自久山廣四十餘里昔土酋自久據高寨

西四十里曰會基山群峰之脉皆起於此

定邊縣治後曰真武坐臺山最後十里曰擁翠山有
刀思卽營寨遺址

北曰螺盤山山頂盤旋形如螺髻西平侯與刀思卽
大戰於此舊產青碌上有自普関

二十里曰無糧山其山萬仞爲西南天塹俗云孔明
亮順寧至此絕糧因名

磳嘉縣西曰黑初山一名虛初高十仞五峯並列連
亘百里蓋縣之主山也山下有石狀類冬瓜色如鐵
土人呼爲黑初山名以此

東曰臥象山形如象臥元設千戶所其上

東北三十里曰卜門山接卜門者曰北門山橫峻陰
拔郡路經之三十六折而上

西南二十里曰羅甸山

南安州東五里曰蒼山隅曰烏龍山林深山秀有
泉出焉

南曰鳳凰山南隅曰羊連山爲學面山文筆峰

西南九十里曰表羅山產銀朴一名老場漢諸銀場
此稱最

鎮南州近治曰鸚鵡山時有鸚鵡集於中林

東十里曰會逢山三十里曰石鼓山上有石形列如
鼓舊縣名以之

南有石吹山相傳山石曾吹着大聲

北去十五里曰十八盤山盤十八折方至其頂

府城東曰鳳泉自地湧滯而起四時不竭注而爲池

又三里曰平山河源自南安州經郡北入龍川江

西三里曰搗練溪其水以釀酒八里曰波羅澗其麓

有夜合樹樹下有滴水至正間設官開井煎鹽輸課

今廢

三十里曰紫溪

北曰龍川江源自沙橋平夷川東南流經府城西合

諸水爲砮碌川又東合諸水經定邊流入金沙江

廣通縣東三里曰清風河源發趙普閣達枯木村

五十里曰捨資河源出武定東流南安界至元江入交趾

東北十里曰雕龍河源出阿陋香山

西一里曰立龍河源出馬鞍山下流經縣西定門外南三十里曰羅繩河流接黑井至金沙江

北三十里曰大河源出楚雄春夏水盛

定遠縣城內有文井在儒學近城曰琅溪產塩泉

東南五里曰黃蓮池以池中曾種黃蓮花也不知何時

西南五里曰龍馬池以曾有龍馬現於池也

定遠縣前曰定遠河源發蒙化府羅止場經和木村

達元江五六月間水洶湧不可渡

東曰環川西曰牟苴河

北五里曰石羊井上有石似羊人不敢動動則井水
泛濫

磧嘉縣東北三十里曰卜門河遶卜門山下

西四里曰南果羅泉曰馬鹿塘河五十里曰上江河
與南安州分界

南安州東三里曰白沙泉本溫泉土人殺大獐之今
變爲寒泉

七里曰黑龍潭

東北二里有石井其泉湧出隨取隨滿南半里又有

大井

鎮南州東北有子旬溪溉田為多

西南一百八十里曰馬龍江源自蒙化入州境西南
流經磬嘉之東又東南入元江

南三十里龍泉泓深莫測歲旱必禱

東二里有玉泉水溫又可溉田

古井有二其水甚甘一在州東一在南安

溫井有三一在州西六十里一在廣通一在定邊東

曲靖府

城西一里曰勝峯山來脉自金馬山為群山長舊名
妙高穎川西平與達里麻戰勝之因名

城南十五里曰負金山石皆青黑可琢爲研又有石
穴狀若馬蹄水深尺餘謂爲研池童子學書者于穴
中取水注研云可善書二十里曰分秦山相傳武侯
與蠻酋盟所

東二十里曰青龍山又曰郎目山山色蒼翠遠望若
畫堪輿以爲黃榜山

南二十五里有觀音洞寬平可容數百人

西南二十里曰真峯山山巒秀麗饒花木下有攝陀
殿後有普賢洞

北二十里曰龍華山東南三十里曰蓮花山與真峰
對

亦佐縣東曰旱感山縣人乞雨處南五里曰法圖山
露孟州東七里曰石龍山西麓有一石如龍

南七十里曰炎方山二百里曰東山

東南二百里曰伯蒙高壓象山

陸涼州東七里曰立雄山上有方池水無盈縮下有
十八泉歲旱禱雨

西一十里曰滿戍山四十里曰郛封山

又有石門平壤之上石笋森密周匝十餘里行者穿
其中故曰石門又東出數百步有離石狀類西嶽三
峰然

西北二十五里曰木容山蒼房可遊

馬龍州東南六十里曰水容菁山南曰伯刻山多怪石

西南六十里曰多羅山多茂林與白刻山相連

西七十五里曰楊茂山又名關索嶺上有關

羅平州南五里曰五臺山二十里曰鍾山

西南一十三里曰白蠟山蒙氏封為安邊景帝之神州人至今祝之

南三十里曰樓閣山屏障學宮

西北八十里曰八部山高二百餘丈其麓百餘里

平夷衛東八里曰密岡山高十餘里雄視萬山

西五里曰楊威嶺多毒蛇十里曰定南山西平侯提

西北五里曰蒙洞山下有從源洞

北十里曰桂花洞洞穴甚深洞口老婆婆老桂芳馨
清遠

越州衛東十五里曰楊梅山產楊梅南三十里曰瀟
湘山

府城東五里曰東海子輪廣五十餘里秋水灌河渚
為巨壑

二十里曰石喇泉又一里曰黑龍潭傍有石洞潭水
源深多資灌溉

南曰瀟湘江源出焉龍州夏秋水泛若瀟湘之勢
十里曰龍泉泉分兩派而灌溉之利甚溥春秋祀焉

北八里曰白石江洪武十肆年西平侯沐英征雲南擒達里麻俘甲士二萬于此

二十五里曰阿幢河匯於交水河近為沙雍

三十里曰雙河源發巖口流經阿幢河

東南二十里曰南河通北海流入六涼

分秦山下有溫泉闊二丈許其沸如湯

亦佐縣新治有步曰黃河四時水色常黃

治西南十五里曰塊澤江源發水驛達羅平

舊治八十里曰以則江

霑州州有盤江二源北流曰北盤南流曰南盤環繞諸山各流千餘里至平伐橫山寨合焉州據二江之

閭

東三十里曰勾諸江

又有東山河源出州傍有州平坦肥沃約百餘頃

南一百八十里曰交河合盤江蠟溪二水

西一百二十里曰車翁江江內爲川江外爲四川東

川府

陸涼州西曰中涎澤合瀟湘江匯於此西北曰南澗

注中涎澤

爲龍州東曰東河西曰西河又西南曰靈泉

南三里曰大龍井東三里曰小龍井南五里曰涼水

井

羅平州西南二里曰太渡河西曰喜舊澤源出龍甸
村流入盤江

北一里曰太乙湖

東南五十里曰矩則江

平夷州城西南二里曰十里河合清溪河至羅平入
廣西泗城州達廣東入南海

越州衛西五里有下橋大河受曲靖大河水及龍潭
河水合流而

潑江府

東五里曰金蓮山日光照耀如金蓮又有賜溥山上
多冬青樹

東南曰回龍山委蛇而下盤伏撫仙湖北若回顧羅藏山者故曰回龍

西南二十里曰玉筍山屹立撫仙湖上高峰獨秀如玉筍然

西十五里曰八仙巖數峰峭拔環接菽旬寇攘必經之地昔有亭障戍卒俱廢議者謂當興以備竊發云西北七里曰舞鳳山自羅藏山來左右兩山宛若飛鳳展翼隆慶四年知府徐可久遷府治於麓

北三里曰關摩山巖穴幽勝下有華藏寺又十里曰羅藏山昔有虎爲民害造柵取之蠻語虎柵爲羅藏故名山高五百餘丈上有龍湫時興雨露舊爲梁玉

寨亦名梁王山二十里曰玗札山

西北二十里曰玉印山

江川縣之東曰海瀛山特起湖中四壁如削凭虛視下競秀爭流又名孤山

西四里曰西山峯巒起伏山多流泉合而入星雲湖南十五里曰蟠坤山東頂有石洞有土主祠鄉民禱雨處

西南三十里曰覆盆山山皆螺甲形若覆盆居民社日祈年之所

西北十五里曰綠籠山有泉入星雲湖

北二十里曰疊翠山山半泉湧三派西流入滇池東

流入撫仙湖南流入星雲湖

陽宗縣東南三里曰荖梓山東三十里曰天馬山危峰茂林沆泉環遶其高處郡之撫仙湖宜良之大池陽宗之梁王山湯池之萬佛寺皆歸目瞻矣

西曰夾浦山彌勒石溪及寒塘二水翼之

四十五里曰朝陽山南二十里曰九岐山

新興州治西曰奇梨山林木蒼蔚有泉流入大溪

東十里曰靈照山每晨起旭日東升光射林麓

西北十五里曰大棋山上若石枰俗傳有爛柯仙跡

語然滇語如此類寔多

東北二十里曰羅磨山下有白龍溪

西北七十里曰蒙習山山頂與晉寧州分

路南州近治曰鹿母山昔有逐鹿至此者南半里曰
紫玉山以其色也

西北二里曰照鏡山削有如鏡

西南五十里曰竹子山高千仞周百里昔爲賊巢弘
治間布政陳金剛平今居民樂業無曠土環向有燭
燭香爐諸峰如楚之玄岳然

東八十里曰劄龍山峰巒高聳下有小石可以煉銅
東北十五里曰休柔山金名九蟠山下有泉流入盤
江

北三十里曰關索嶺可三十餘丈卽邑小小關隘也

府城南十里曰撫仙湖週三百餘里北納諸溪南受
星湖玉筍山撫其上翩翩若仙人東會鐵池盤江而
達南海

西十三里曰西壩泉在蟠龍岡石崖下左右潭泉合
流成溪田用以灌

東二十里曰鐵池河源自陸涼州流經宜良至鐵池
鋪入山峽數十里會撫仙尾間南過興寧溪入盤江
河外竹山五叢林木深密伏戎之萃扼河可守蓋天
塹也

江川縣南曰星雲湖週八十餘里四五月南風發則
魚盛漁人之利居多水隸海門入撫仙達南海

西曰長里泉北十里曰阿化泉源發綠籠山入星雲湖

三河一曰上河發源於阿化衝分流於前廣二衛田一曰中河抵烏雅村一曰下河分中河之流灌左衛營田

西北十二里曰隴立衝河發源本衝流入明湖西曰雙井溫泉兩井俱入星雲湖廢邑市縣治北亦有溫泉合此爲三泉

陽宗縣南五里曰大衝河在羅藏山下澗溪諸水聚而爲河隆慶年間水潦堤決知縣文嘉謨濬而深之民賴其利

北一里曰明湖週七十里水色深黑莫測源出羅藏山下流入盤江

西又有錦溪西北八里曰日南溪一名芭蕉河源出覺卜山下伏流至天生橋後出成溪

西南七里曰自練泉西北七里曰七古泉源出麥田江過北斗村入明湖

新興州西北五里曰大溪河源出夾雄山過羅摩奇梨二溪出嵒峨入曲江曰蘿木箐河自晉寧州經大堡入普義縣曰密羅河源出密羅村經甸尾入嵒峨路南州東二里曰興寧溪迤州治西南興鐵池河會流入盤江

又十二里曰黑龍泉每歲正月八日州人祀之

蒙化府

東南去城二里曰巍甯山昔細奴羅耕牧之地武侯
斷其山脉以爲厭勝而曰靈山

北三里曰棋盤山上有石狀如棋盤布列黑白石子
牧童或亂之明日復如故

城東曰玄珠山面有一塔武侯所鎮

南曰天臺山秋空縱觀可周百里卜五里曰日遊山
日出入照之

東北十五里曰伏母山北七十里曰天耳山上有赤
石如印凡郡人密語山中即聞又有石母山出石黃

雄黃天旱民創此山即雨下有泉

西北三十五里曰龍岍山蒙氏龍伽獨自哀牢將其子細奴邏徙居於此築龍岍圖城自立爲奇王號蒙舍詔上有浮屠寺

四十里曰金牛山一名寨子山

三十五里曰天馬峰近天馬者御筆峰

城西南一百五十里曰蘭蒼江源出吐蕃嵯和歌甸南流至永昌稍東至順寧過府境歷景東入南海蒙氏四瀆之一

城西曰陽江源出甸頭花判澗南流至甸尾迤司力十里過定邊縣與迷川禮社江合入元江達南海

西北二百里曰漾澤江一名神莊江出劍川經打牛坪遠點蒼山後至龍尾關達洱水末流合而入蘭蒼江

蔡陽河源出東山流經城南門外又七里為五道河北二里為教場河又二里為寄馬椿河又六里為南壯河又十里為盟石河又三里為橋頭河又五里為鎮邊河又十里為雙橋河又十里為甸中河又十里為捉馬郎河又二十里為甸頭河有巡檢司泮井在學宮清流不竭

觀井在玄珠觀內病者飲而愈

鶴慶府

西五里曰覆釜山爲郡鎮山形最房南北諸山供翼
抱覆釜者曰仰止山覆釜之麓曰秀臺山二十五里
曰逢密山三峰八雲山腰有洞

西北五里曰拱面山高百仞一峯拱向林壑環映可
卜陰晴山有石瑩如雪

七里曰石寨山四方皆險惟頂稍平

西南十里曰朝霞山常見彩霞山半有風洞徑六寸
有風氣噓吸夏至日郡人群聚就洞口以目薰之可
愈目青十八里曰紅土岡二十里曰宣化山上設巡
檢司二十二里曰馬耳山三十里曰垂珠洞五十里
曰金牛坡

東十七里曰峰頂山峯巒率頂有佛宇郡人於三月望日以方失祈嗣

東南二十里曰月山積石形如半月二十五里曰象眠山下有石穴潛洩漾共之水入金沙江

三十里曰龍華山七十里曰天成坡小成坡一百三十里曰大孟巖石壁屹立橫三十餘里形如城郭上多古樹奇花幽禽猛獸曰煉塢巖下有溫泉

南二十里曰南松嶺二十五里曰茅角山五十里曰龍珠山昔有龍吸珠於此七十里曰七坪峯

一百二十里曰方丈山南畔有洞中有池水滴崖下有鼓音上有觀音像又名觀音山一統志南詔名山

凡十七此其一也

又有半子山產朴湯乾山產紫石

南一百三十里曰大極洞翠嶂深幽碧潭澄淨土石各半若分剛柔而互生

北三十五里曰青玄洞在逢寮山半甚廣闊洞門有石柱頂上有石孔鍾乳淋漓兩壁皆蒼苔景絕幽秀每年六月廿六日遊人燃松炬而入乃窮其勝

鈿川州治西一里曰金華山脈自西番界羅均山盤曲而來延二十餘里山頂常有紫色如金四里曰鈿利山狀如鈿

南六里曰鍾賢巔脈自金華行二十里之遠

東北五里曰建和山

東十五里曰青崖山產青石如列翠屏

西南二十里曰石寶山有石佛石棧石井獅象鍾鼓之異五色躑躅被陵谷間

順州北一里曰漕峰山其上常有鶴七里曰公山危巖聳拔數峰榮迥雨霽則霞彩層見州人請焉東北六里曰楊保山下有池多蒲草

西南十里曰烏鋪山林木葱蒨每秋群鳥棲在上

府治南五里曰長康河源出黑龍潭曰落鍾河源出朝霞山十五里曰溫水河源出宣化山麓

二十里曰南供河一名銀泉二十五里曰桃樹江出

岑角山流入南山巖穴中

三十里曰三莊河曰腰江一百二十里曰桑木箐河
出馬耳山一百三十里曰仙女井

東五里曰漾共江一名鶴川闊十丈餘源出麓江界
經府治東南象眠山麓群峰環合潴而爲湖石穴一
百八孔潛滲山後復出會金沙江

九里曰大水溪泉

西十里曰羅牧社海在觀一山西周圍八里

東南一百里曰龍馬井

一百二十里曰金沙江

西北十里曰石洱河源出石寨山流入漾共江

東北十里曰白石溪泉十五里曰小柳場泉三十五里曰西墩泉

西南一百里曰觀音山河源出黑泥山神二哨至天營分而爲二一自浪穹縣一自普陀崆至鄧川合流入洱水

龍潭在府治者有十五曰黑龍曰青龍曰白龍曰西龍曰龍寶曰吸鍾曰石朶曰香米曰北溪曰柳樹曰小柳南曰赤土和曰宣化俱流入漾共江曰龍公流入金沙江曰大龍在半子山下

溫泉有三一在煉場巖一在觀音山一在驛南

春水有三一在石朶河一在龍珠山一在石碑坪氣

味若硫每歲二三月間土人取和鹽梅飲之能已疾
鸚哥水在鸚哥鋪東自石巖注下常有鸚鵡懸巖仰
飲故名又以名鋪

劍川州南二一曰西湖在金華山麓溢爲湖涸爲田
五里曰劍湖周六十里湖尾遶流羅魯城南經漾澤
與洱水合歷車里八百入南海十五里曰劍川即湖
尾水曲流爲三折形如川字以此名州若蜀之巴江
也

三十里曰桃羌河五十里曰靈泉出石寶山頂石巖
中闊二尺深倍之甚寒而冽不涸不盈

六十里曰沙溪河源出劍湖七十里曰春水在沙溪

村一百里曰摘沙浪河在白水場與劔湖水匯南流
西一里曰崖場水自老君山下流入劔湖

東二里曰大橋頭河即古之合惠尾江每遇洪潦害
稼

龍潭在州治者有九曰老君曰楊堤坪曰仙女轍曰
隔溪曰建河曰白雞陀俱流入劔湖曰花叢曰白龍
曰青龍俱入湖尾

溫泉有三一在羅老邑村一在求仁甸鄉一在橋後
鄉

順州東二里曰牛甸湖二十里曰河頭溪石叢下出
周八十餘丈春溫可浴

又曰濟浦海周三十里中分西畔屬順州東畔屬北
勝州併羅牧社海劍湖魚課俱入劍川河泊所

姚安府

城東八里曰寨子山土巽自久叛立寨於上今遺址
猶存有泉湧出流入爲魯湖

十里曰飽煙蘿山一名東山其西武侯嘗駐兵後人
建塔識焉

十五里曰白馬山昔有白馬著形立廟祀之
二十里曰燕子山其形如燕壘

西曰龜祥山一名赤石山形如龜山頂有泉

五里有金房山又有龍馬山二一在府一在大姚

七十里曰稽肅山下有泉流入陽派

南二十里曰筆架山三峯聳峙中峯有井雲出即雨
大姚縣有山亦然

六十里曰三窠山在三窠關舊有三古松恒見光怪
變夷以爲金銀氣而掘之枯其一

北一百里曰黎武山高而長中有寺

西北十五里曰仙景山一名石雲昔人修真羽化之
所有石甲西嶺二泉

東北十五里曰九鼎鍾山一名筆山山有九峰若懸
鍾然每春花事遊者迷焉

北一百二十里曰綠蘿山一名盤曲上有綠蘿蘭若

大姚縣南一里曰几山左隅有石穴一名石壁洞後
四里曰回音山峰高聳

西一里曰文筆山後曰鳳凰山左曰觀音山各約二
里西北三里曰玉屏山

北曰鐵索箐遙遙千里昔爲夷賊恃險出沒巡撫鄒
公應龍平之

北三十里方山多產藥一百三十里曰馬鞍山

東北一百五十里曰書寨山形如几案

白鹽井提舉司東一里曰迴龍山南一里曰北極山
西一里曰寶關山高百仞以其通鹽司之要路土人
名曰寶關指鹽云

北一里曰象顧山其形如象

府大川曰金沙江南四十里曰靖蛉河舊名三窠成江源出三窠山流至府南潄為大石湖分為東淘溪西淘溪遠府而北合趨大姚河轉入金沙江

西十五里曰陽派河出金秀山下流至府潄為湖二十里曰連水出鎮南木盤山經府之連場入大姚河趨金沙江

北曰秀水河源出府北黎武村觀音塘與白井提舉司觀音山菁水合流入金沙江

東十五里曰烏牛井東南曰春郎井西曰金龜井有仙境山麓曰西崩泉昔有老人磨杵於此其石猶存

在白馬山谷者曰馬泉有兩泉湧沸在東山者爲黃龍泉在白塔右曰大康郎泉俱溉田

西曰大姚河源出書崇山西流與鐵索箐水合經姚州後繞縣東北入蜻蛉河

曰羊蹄江源自摩些村東入金沙江曰一字水出黎武山北合小井東流入一拋江

曰土橋河源自白井香水河分派東流入金沙江

南門內有鳳井東曰醉翁井清冽不涸北曰三窠泉曰冷水泉曰摩些泉

溫泉有三一在甯西黑泥只村一在北交摩村一在大姚縣東

北一百二十里曰龍蛟江金名苴泡江源出鐵索箐
合姚州之連場香水二河入金沙江

廣西府

城內曰鍾秀山郡學建於此

西北一里曰然果山培塿相接環於府治

南二里曰翠屏山東南五里曰吉輸山

東二里曰還浦山三里曰廣福山

西三里曰阿盧山廣四十餘里南接彌勒北跨師宗
舊為阿盧部

十里曰煙光山

師宗州北五里曰恩容山十二里曰銷北門山兩峯

排列若戶然

西七十里曰龜山極高峻夷羅之數

東八十里曰英武山高數百仞一百一十里曰祿德
山孤峯特起甚秀二百四十里曰馬者龍山弘治十
年本州所定鄉有山高可五丈磅礴二十餘丈一夕
移二十餘里止於此山傍有三大樹皆不動其舊處
遂為平地三百里曰高來山

彌勒州南五里曰部龍山峯巒重疊環於州治

西十里曰阿欲部山盤七十里有奇

北三十里曰北傾山高可十五餘仞西接阿欲備回

二山

東南一百二十里曰盤江山東西兩山相峙盤江流其中東抵師宗南界阿迷中有石窰深廣丈餘濁水湧出入盤江

西南曰煙北山南有法烏洞三十里曰玉龍洞

十八寨山在州界山箐連屬其中夷種最蕃務剽掠蓋盜數也

維摩州治西曰曲部山中峯高聳下有泉流歸石窰東北八十里曰小維摩山一百里曰萬年龍山下有泉成溪流入廣南又有寶寧山下有泉爲寶寧溪劬東南九十里曰阿世山一百里曰大維摩山高出象山土司歷世所居一百五十里曰接角山下有溪亦

名接角三百二十里曰龍尾山高舉屹然

有城西三里曰西瀘河五里曰西瀘洞洞之西曰瀘源洞曰盤江自宜良縣流入羅平郡中諸水惟此為大又有已盤江一名番江自潯江東南流經師宗至彌勒東注黔之普安

城南和穆榮村曰龍江灣抱城南而流曰西溪

東南曰矣邦池一名龍甸海周三十餘里半跨彌勒水源有二一出阿盧山石竅一出彌勒吉雙鄉南入盤江中有小山朔福廣寺

師宗曰大河口曰通玄洞南三十里曰阿渠溫泉彌勒州治內曰山湖多產巨魚

西北曰巴甸江南流數里而東入於盤江

北曰八甸溪其源有三一出阿欲山一出舊村一出北傾山至州治東合流而南入盤江

西十里曰溫泉在阿欲部山闊三丈許深三尺餘水色青碧

十八寨東五里曰白馬河

尋甸府

城東北八里曰月狐山迴合計五十里許山頂之雲以古雨一名鳳梧山

西曰勇克山林壑幽邃積雪不消不有泉為懷倭溪俗呼雪山曰隱毒山相傳此山無嵐瘴鄉人避暑

六十里曰果馬山下有泉爲溪

舊歸原縣西南落隴堆山綿亘五十餘里其東有
哇山聳秀如劔鋒土人築寨於上險不可攻亦名安
藥城

在府之曲里曰龍頭山下有三溝之水聚爲一河抵
東川馬湖江

北十里曰珀當山下有泉水穿出府河

西亦郎里曰三稜山上有九十九泉曰鳳凰麒麟二
山

之曲里曰怒勒峯中有一海多魚利界連雷益六寨
乾夷居之曰額吾峯上有青水塘下有溫泉乾夷往

來兩峯之間以爲曲窟宅曰那多峰有大石寨連東川俱乾賊潛處下有龍泉

在可郎焉曰崖峰山其崖多蜂房土人割其蜜曰崖蜜異於人家桶取者曰洗納山有熱水塘二大樹亭亭如青蓋然曰峰岡山上有龜塘產龜

在欽莊焉曰五華山

在普按焉曰梁王山接高明界

曰海岳山接洗納竜寨

在怒郎村曰金鞍山

在舊爲美縣西三十里曰磨浪水

北五里曰螳螂河源出龍洞有灌溉之利又有矢郎

為泉其流至沙淋村

米十五里曰阿文合溪其源有二一出高明一出馬龍至府東南五十里合流入雷益三十里曰排頭洞近三岔河半里許洞高深各二丈有石筍獸蹄鳥跡之狀

西四里曰仙人洞十里曰三龍泉四周皆石水穿石出三十里曰車湖一名青水海廣四里山環水聚南畝賴焉

在欽莊曰寧華江在木蜜所西曰龍泉

武定府

城西一里曰獅子山石巖如獅絕頂坦然上有石城

清池蒼松二株中藏深谷可以容萬人

五里曰三臺山疊起如臺

東三里曰五峯山五峯攢列郡前如案

東北四十里曰紅崖峽崖如赤壁險不可步弘治間
平治之

三百里曰烏蒙山一名雪山與東川爲界上有十二
峯雄拔陡絕盤旋七十里頂有烏龍泉下流爲烏龍
河八九月間常有雪又名絳雲露山北臨金沙江爲
諸山之冠蒙氏僭封爲東嶽

西二十里曰天馬山曰筆架山西南三十里曰鋪哇
山有懸瀑千丈注成池者曰鋪哇湊

北二十里里曰佐丘山西北曰倚桑山有泉下流爲
甸河八十里曰雄軸龍山形勢峭峻林木森鬱
元謀縣西北十里曰住雄山一名法靈山谷呼環州
山摩空壁立而枕楚陋甸東連諸山環於州境二百
里曰竹沙雄山高山羣山上多竹木

北三十里曰吾梁山巖甚孤秀又有雷應山高三十里
絕頂有古利翠微深奧老樹参天土人傳爲雷起處
西北有火焰山

縣南曰馬頭山連四十里尋甸威楚黎泥華榆隨方
而寓目瞰縣治在下方耳

祿勸州故易籠縣東北曰幸丘山四面陡絕頂有三

峯可容萬家昔爲羅婺寨有天生城牢不可破

瘞石舊縣西北三十里曰法塊山四面峭立惟東南一徑可容單騎其傍有哀阿龍山今葬戰骨於此府治後五里曰烏龍河源出烏龍洞溉田數百頃曰西溪河源出鎮南經楚雄至元謀西而入金沙江西北八十里曰惠滿湖湖方五里茂林佳木掩映其傍水色青碧經秋葉落時鳥輒啣去民異之

北三百八十里曰金沙江源出吐蕃經龍川犁牛石下歷姚安至本府北界又東達黎溪治江多嵐雨即冬月行猶然決汗行者多以雨中及夜渡

東北曰蓮花井常清不涸北曰龍橋水流入治南與

掌鳩水合曰勒夷水源自廢南甸縣北流入金沙江
南二里曰香泉入春而香土人於二三月采之然後
汲用廢南甸縣南三里亦有香泉臭味同也
和曲州舊治西五里曰冷泉其寒徹骨十五里亦有
香泉

元謀縣曰應元溪源出和曲州虛仁驛經馬頭山流
縣入田曰紀寶溪源出定遠

在法納禾村曰溫泉其沸如湯可燂羊豕

祿勸州廢石舊縣東南曰普渡河曰掌鳩水其水自
治北流入東南與欽莊樂寧二水合至普渡河達於
江數十渡合處形如獅子又名獅子口

溫泉有二一在州南五里一在小緝麻村鳳氏所筑
今變為寒泉有遊魚矣

景東府

南一里曰銀屏山山形如之

東曰邦泰山土官世居其麓

西曰景董山昔為苗寨今立衛城

北三十里曰鶴龍山

九十里曰蒙樂山一名無量山亘三百餘里一峯特
出上有石枰蒙氏僭封為南嶽上有泉水毒流入畜
飲之立斃

曰浪滄江即蘭滄流經府西南二百餘里南至車里

曰大河源出定邊縣阿拉村合三岔河流經府治南
入馬龍江

在蒙藥山南通華河其北曰清水河俱東流入於
大河曰覓泉源出蒙藥山衛城舊無井泉指揮袁賢
始治竹筧引入城鑿池構亭於上

北九十里曰龍潭遇旱禱焉

元江府

東北一十里曰自樂山一名棲霞山二十峯懸崖峭
壁狀若崕峒又有玉臺山磅礴如臺蒸而為雲倏忽
瀾溫一望盡白

南二十里曰嵯峨山有峯嵯峨如卓旗狀曰天馬山

房如華峯相對侍學宮之前

西二十里曰寶山圓如螺髻尖如挿簪俗傳昔有蠻酋藏寶山麓因名

四十里曰因遠山下有泉爲仲夷溪東流入禮社江東五十里曰路通山青入天際一綫羊腸通臨安路舊名馬龍山

北曰奇山舊名龍瓜有涵春泉仙人洞奇怪萬態西北三百里曰九龍山產朴名魚鳧場

禮社江一名元江源自白崖合蘭蒼遠庠城東南入南安州

西北一十五里有溫玉泉石間迸出如湯

西四十里有良莪河

南三百里有三江一自猛野一自景東一自杉木江
流三合故名三江口

麗江府

西北五里曰象山其下有泉

東二十里曰東山一曰吳烈山峰巒起伏環拱府治
西南二十里曰珊瑚碧外龍山孤峯竄率產箭竹

西北二十餘里雪山一名玉龍山上插雲霄下臨

麗水山巔積雪經夏不消巖崖澗谷清泉飛流蒙氏
異牟身偕封爲北猷

通安州南三十五里曰馬王墅他郎場山土人以爲

牧地

寶山州西南二十五里曰阿那山上有阿那和寨
北八十里許曰珊蘭閣山

蘭州南一十里曰雪盤山四時積雪疑焉北曰福源
山距東南五十餘里

西北二十里許曰老君山古名如剌均山頂深淵凡
五直聞蕭鼓聲常放斃牛又爲牧牛山

巨津州東北二十里曰金馬山有石狀如馬

東南一百五十里曰花馬山以山石之色類之唐
詔名其國曰花馬國本此

西北二百八十里曰漢鼓山高可萬仞上有三湖各

寬五畝深不可測

臨西縣治西曰果鋪山

金沙江古名麗水源出吐蕃界犁石名犁水記犁為麗經巨津寶山三州江出金沙故名元憲宗三年征大理從此濟

蘭蒼江源出吐蕃嵯歌旬流經蘭州西北三十里清溪其源有二一出東山一出雪山至東園里合流繞府城前

西南十里曰龍潭闊數十畝四畔草結如葑暉後及一方三方皆歉又或近之風雨輒起云昔有耕者為暴風雨捲入潭至今或見其人及牛犁旋繞其中

通安州八十餘里阿失村有溫泉春冬浴之

皆泉有二一出吳烈山澗內一出州南刺沙村其味
皆微苦飲之祛疾

蘭州治南有白石溪中多白石

廣南府

西北五里曰牌頭山峰巒起伏其右小山連峙如盾
土民築寨其上

東北二十里曰蓮花山五峰連起諸小峯參差傍峙
形如蓮花

富州治西曰祛玉山形如石獅昔土人結屋以避兵
名獅頭寨

西北七十里曰王泉山頂有泉如素練下有石池甚清碧流入西洋江

東南九十里曰者鵠山高可二百仞怪石嵯岬昔為首寨

東北一百五十里曰西寧山下有崖洞蠻多隱遁其中潛出為患

府南八十里曰西洋江源出板郎連部木王三山合流入田州至粵之右江

富州東三十里曰南木溪源出花架山其水常溫西曰南汪溪源出麻卵僻令二山流至州南合南木溪東行至石洞伏流十五里復出入於右江

順寧府

治西一里曰鳳山西北十五里曰樂平山爲郡鎮山
西十五里曰中阿山有石銘見古蹟

北十五里曰倮山一名玄玉山黛色如畫

又有交鳳山一在治東一在治西如雙鳳

南四十五里曰把邊山兩山相對一運中通閘塞建
其上

西北八十里曰九層樓山巔盤九層山椒有粟落
東一百二十里曰泮山其下卽蘭滄黑惠二江合流
處

西南一百八十里曰鐸山林深谷奧下臨絕澗以藤

橋渡

二百里曰西粵山俱石壁有瓊英洞洞肖城闕廣約十餘丈許嵌空奇崛上有青蓮華蓋中有石鼓磬擊之琳瑯深邃莫窮其致

北一百八十里曰阿魯使泥山其山有白霞洞深十餘步上有華蓋如樓閣時見白氣出入如霞

二百三十五里曰赤通山狀如赤龜黑惠江如蛇盤其下山阿有聚落行人宿於此

二百四十里曰蝟蟻者石山極高皆奇石嵌空詭形怪狀如出鬼工其聚落名蝟蟻

雲州治後曰鎮夷山南曰永寧山與平頭山對

西六十里曰蠻賴山多竹東六十里曰習彌山北八
十里曰八刺山南二百五十里曰蠻彌山林密山深
崖石壁立

西南三百里曰阿輪山連峯蒼然

猛緬司西南曰梳頭山其高六十里又有美水山多
古栢東曰天喜山曰接天山多雪

猛猛司南曰邦偏山高六十里

猛撒司北曰狃撮山高二十五里最陰

府治東曰順寧河源出甸頭村山箐流入雲州孟佑
河

南一里曰甕礫河水出南山與順寧會而東注

三十五里曰洛旬河出中阿上下流入順寧河

北十里曰臘門河南流與順寧河會其水分以溉田
東北七十里曰蘭滄江源自金齒東南流經府境與
黑惠江合南歷景東元江交趾入南海

其東曰黑惠江即憐溪江水繇大理劍川二澤與漾
濞水合爲一江經府洋山下入蘭滄達南海二江蒙
氏俱封以貢

西北五十里曰西添河源出喻甸都甕村

北一百八十里曰阿魯使泥河源出阿魯使泥山下
流入黑惠江

南曰阿鐸河水勢迅急土人構藤而渡有魚似鯉而

非也甚肥

北一百九十里曰虎墟河出阿城舊村南流入黑惠江舊有虎墟

龍湫在府治南山之麓方一畝林木叢蔚或云有龍在中人過而畏之

溫泉有二一在阿枉村一在西添村

治西曰蘊古泉夷語謂泉爲菴謂湧爲古又名菴古泉澄澈可鑑

雲州南八十里曰猛賴河曰南看河繇順寧出遼州之左曰南謬河繇矣堵出遼州之右歸左合南看河猛緬司東有大河北流至猛賴又有金水河

猛猛大河南流入臘避江

猛撒大河北入山穴中出猛短河

永寧府

東南一十五里曰干木山高八十餘丈一名孤山

東三十里瀘沽湖內有三島高可百丈土司水寨居其上

刺次和長官司治西曰六搜山

草甸長官司治北曰幹如山

香羅長官司治西曰卜几山

瓦魯之長官司東北三十里曰刺不山

府東三十里曰瀘沽湖即魯密海子

東北六十五里曰溫泉在瓦都寨傍

曰羅易江源自浪蕩州北流過府境又有勒汲河源
出西番府治之北又東折入蜀川接井衛

瓦魯之長官司西曰金沙江

鎮沅府

城東曰石山西曰波弄山山勢起伏重疊如波濤然
東北曰鳥連山鳥常集焉曰案板山高百餘仞形如
几案舊寨以此名

長官司北八十里曰馬客山高千餘丈盤數百里石
路險狹僅容一馬

祿谷寨南一百里曰石羅山東一百一十里曰小不

舊山西二百里曰納羅山多虎豹土人呼藏爲納虎
爲羅

杉木江源出者樂甸流經府治南入威遠州界江岸
多產杉木

馬湧江源出納樓茶甸經祿谷寨東下流合南浪江
南浪江源出納羅山經祿谷寨南下流入寧遠州

鹽井有六皆出波弄山上下土人掘地爲坑深三尺
許納薪其中焚之俟成炭取井中之滴澆於上次日
視炭與灰皆爲鹽矣其色黑白相雜而味頗苦俗呼
白雞糞鹽

北勝州

治西二里曰烏洞山上列五峯下一洞廣丈餘曰拜佛臺山亦在治西

東三里曰東山石壁間有刻吳道子畫釋迦觀音二像

西南二里曰蘭滄山高二百餘丈

東二里曰現錢山亂石形如錢曰香爐峯三山鼎立東南三里曰三泉山上有石崖湧出三泉山下居民資其灌溉

西南三里曰金水蒼山西北曰紅石崖南十里曰烏鴉山形如削玉四十里曰伏龍山

西二十里曰鷄鳴山北三十五里曰甸頭山群峯聳

列景色蔚然

東南一百里曰大坡南嶺山頂有龍湫聞人聲則風
電立至

南曰九龍山高萬丈餘登其頂四顧千里

一百三十里曰老虎山形如虎往來獨行者爲山怪
所攝諸葛南征至此遂斬其首分而爲三
一百四十里曰象鼻嶺

西白角鄉曰白角山西南綿綿鄉曰綿綿山

治東曰羅易江流入永寧府東南三十五里曰岷峨
海

南四十里曰程海周八十餘里相傳本陸地有程姓

居此一夕忽沉爲海故名五十里曰程湖灌溉田畝
下流入金沙江

一百四十里曰大龍潭曰三渡河旋繞三圍故名二
百三十里曰小龍潭

西十五里曰九龍潭泉有九眼灌田萬餘畝下流入
金沙江五十里曰五浪河源出四川

北五里曰汝河民多資其灌溉

西北五里曰春水泉水味如醴歲春居民攜酒饌爲
宴樂汲水和鹽梅諸物飲之謂之喫春水

西南曰白角河流入西番界一百五十里曰桑園河
流入金沙江

溫泉有二一在枯木村一在沙田村